

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

चतुर्थकाण्डे चतुर्थः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Table of Contents

4 कृष्ण यजुर्वेदीय तैत्तिरीय संहितायां पद पाठे चतुर्थ
काण्डं 3

4.4 चतुर्थकाण्डे चतुर्थः प्रश्नः – पञ्चमचितिशेषनिरूपणं..... 3

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

4 कृष्ण यजुर्वेदीय तैत्तिरीय संहितायां पद पाठे चतुर्थं काण्डं

4.4 चतुर्थकाण्डे चतुर्थः प्रश्नः – पञ्चमचितिशेषनिरूपणं

TS 4.4.1.1

र॒श्मि॒र॒सि॒ क्ष॒या॒य॒ त्वा॒ क्ष॒यं॑ जि॒न्व॒ प्रे॒ति॒र॒सि॒ ध॒र्मा॒य॒ त्वा॒ ध॒र्मं॑
जि॒न्वा॒न्वि॒ति॒र॒सि॒ दि॒वे॒ त्वा॒ दि॒वं॑ जि॒न्व॒ स॒न्धि॒र॒स्य॒न्त॒रि॒क्षाय॑ त्वा॒ऽन्त॒रि॒क्षं॑
जि॒न्व॒ प्र॒ति॒धि॒र॒सि॒ पृ॒थि॒व्यै॑ त्वा॒ पृ॒थि॒वीं॑ जि॒न्व॒ वि॒ष्टं॑भो॒ऽसि॒ वृ॒ष्ट्यै॑ त्वा॒
वृ॒ष्टिं॑ जि॒न्व॒ प्र॒वा॒ऽस्य॒हे॒ त्वा॒ऽह॒र्जि॒न्वा॒नु॒ वा॒ऽसि॒ रा॒त्रि॒यै॑ त्वा॒ रा॒त्रिं॑
जि॒न्वो॒ शि॒ग॒सि॒ – [] 1

TS 4.4.1.1 - Padam

र॒श्मिः॑ । अ॒सि॒ । क्ष॒या॒य॒ । त्वा॒ । क्ष॒यम्॑ । जि॒न्व॒ ।
प्रे॒ति॒रि॒ति॒ प्र॒ – इ॒तिः॑ । अ॒सि॒ । ध॒र्मा॒य॒ । त्वा॒ । ध॒र्मम्॑ । जि॒न्व॒ ।

अ॒न्वि॒ति॒रि॒त्यनु॑ – इतिः । अ॒सि॒ । दि॒वे । त्वा॒ । दि॒वम् । जि॒न्व ।
स॒न्धि॒रिति॑ सं – धिः । अ॒सि॒ । अ॒न्त॒रि॒क्षाय॑ । त्वा॒ । अ॒न्त॒रि॒क्षम् ।
जि॒न्व । प्र॒ति॒धि॒रिति॑ प्र॒ति॒-धिः । अ॒सि॒ । पृ॒थि॒व्यै । त्वा॒ । पृ॒थि॒वीम् ।
जि॒न्व । वि॒ष्टं॑भ इति॑ वि॒-स्तं॑भः । अ॒सि॒ । वृ॒ष्ट्यै॑ । त्वा॒ । वृ॒ष्टिम् ।
जि॒न्व । प्र॒वे॒ति॑ प्र – वा । अ॒सि॒ । अ॒ह्ने॑ । त्वा॒ । अ॒हः । जि॒न्व ।
अ॒नु॒वे॒त्यनु॑ – वा । अ॒सि॒ । रा॒त्रि॒यै । त्वा॒ । रा॒त्रि॒म् । जि॒न्व । उ॒शिक् ।

अ॒सि॒ । १ (५०)

TS 4.4.1.2

व॒सु॒भ्य॒स्त्वा॒ व॒सू॒ज्जि॒न्व॒ प्र॒के॒तो॒ऽसि॒ रु॒द्रे॒भ्य॒स्त्वा॒ रु॒द्रा॒ज्जि॒न्व॒
सु॒दी॒ति॒र॒स्या॒दि॒त्ये॒भ्य॒स्त्वा॒ ऽ॒दि॒त्या॒ज्जि॒न्वौ॒जो॒ऽसि॒ पि॒तृ॒भ्य॒स्त्वा॒
पि॒तृ॒ज्जि॒न्व॒ त॒न्तु॒र॒सि॒ प्र॒जा॒भ्य॒स्त्वा॒ प्र॒जा॒ जि॒न्व॒ पृ॒त॒ना॒षा॒ड॒सि॒
प॒शु॒भ्य॒स्त्वा॒ प॒शू॒ज्जि॒न्व॒ रे॒व॒द॒स्यो॒ष॒धी॒भ्य॒-स्त्वौ॒ष॒धी॒-र्जि॒न्वा॒भि॒जि॒द॒सि॒
यु॒क्त॒ग्रा॒वे॒न्द्रा॒य॒ त्वे॒न्द्रं॑ जि॒न्वा॒धि॒प॒ति॒र॒सि॒ प्रा॒णाय॑ – [] २

TS 4.4.1.2 - Padam

वसु॑भ्य॒ इति॑ वसु॑ – भ्यः॒ । त्वा॒ । वसून्॑ । जिन्व॒ । प्र॒के॒त इति॑
प्र – के॒तः । अ॒सि॒ । रु॒द्रेभ्यः॑ । त्वा॒ । रु॒द्रान् । जिन्व॒ ।
सु॒दी॒तिरिति॑ सु॒– दी॒तिः । अ॒सि॒ । आ॒दि॒त्येभ्यः॑ । त्वा॒ । आ॒दि॒त्यान् ।
जिन्व॒ । ओजः॑ । अ॒सि॒ । पि॒तृभ्य॑ इति॑ पि॒तृ – भ्यः॒ । त्वा॒ । पि॒तृन् ।
जिन्व॒ । तन्तुः॑ । अ॒सि॒ । प्र॒जाभ्य॑ इति॑ प्र – जा॒भ्यः॒ । त्वा॒ ।
प्र॒जा इति॑ प्र – जाः॒ । जिन्व॒ । पृ॒त॒ना॒षाट् । अ॒सि॒ । प॒शुभ्य॑ इति॑
प॒शु – भ्यः॒ । त्वा॒ । प॒शून् । जिन्व॒ । रे॒वत् । अ॒सि॒ ।
ओष॑धीभ्य॒ इत्योष॑धि – भ्यः॒ । त्वा॒ । ओष॑धीः । जिन्व॒ ।
अ॒भि॒जि॒दि॒त्यभि॑ – जि॒त् । अ॒सि॒ । यु॒क्त॒ग्रा॒वेति॑ यु॒क्त – ग्रा॒वा ।
इन्द्रा॑य । त्वा॒ । इन्द्र॑म् । जिन्व॒ । अधि॑पतिरित्यधि॑–पतिः॒ । अ॒सि॒ ।
प्रा॒णायेति॑ प्र–अ॒नाय॑ । 2 (50)

TS 4.4.1.3

त्वा॒ प्रा॒णं जिन्व॒ यन्ता॑ऽस्य॒पा॒नाय॑ त्वा॒ऽपा॒नं जिन्व॒ स॒ꣳस॒र्पो॑ऽसि॒
चक्षु॑षे त्वा॒ चक्षु॑र्जिन्व॒ वयो॑धा अ॒सि॒ श्रो॒त्राय॑ त्वा॒ श्रो॒त्रं जिन्व॒

त्रिवृ॑दसि प्र॒वृ॑दसि सँवृ॑दसि वि॒वृ॑दसि स॒॒रो॒हो॑ऽसि नी॒रो॒हो॑ऽसि
प्र॒रो॒हो॑ऽस्यनु॒रो॒हो॑ऽसि वसु॑कोऽसि वेष॑श्चिरसि वस्य॑ष्टिरसि ॥ 3

TS 4.4.1.3 - Padam

त्वा । प्रा॒णमि॑ति प्र – अ॒नम् । जि॒न्व । य॒न्ता । अ॒सि ।
अ॒पा॒नाये॑त्यप – अ॒नाय॑ । त्वा । अ॒पा॒नमि॑त्यप – अ॒नम् । जि॒न्व ।
स॒॒स॒र्प इति॑ सं – सर्पः॑ । अ॒सि । चक्षु॑षे । त्वा । चक्षुः॑ । जि॒न्व ।
वयो॑धा इति॑ वयो – धाः । अ॒सि । श्रो॒त्राय॑ । त्वा । श्रो॒त्रम् । जि॒न्व ।
त्रिवृ॑दिति॑ त्रि – वृत् । अ॒सि । प्र॒वृ॑दिति॑ प्र – वृत् । अ॒सि ।
सँवृ॑दिति॑ सं – वृत् । अ॒सि । वि॒वृ॑दिति॑ वि – वृत् । अ॒सि ।
स॒॒रो॒ह इति॑ सं – रोहः॑ । अ॒सि । नी॒रो॒ह इति॑ निः – रोहः॑ ।
अ॒सि । प्र॒रो॒ह इति॑ प्र – रोहः॑ । अ॒सि । अ॒नु॒रो॒ह इत्यनु॑ – रोहः॑ ।
अ॒सि । वसु॑कः । अ॒सि । वेष॑श्चिरि॒ति वेष॑ – श्रिः । अ॒सि ।
वस्य॑ष्टिः । अ॒सि ॥ 3 (43)

(उ॒शि॒गसि॑ – प्रा॒णाय॑ – त्रि॒च॒त्वारि॒॑श्च) (A1)

TS 4.4.2.1

रा॒ज्य॒सि प्रा॒ची दि॒ग्व॒स॒वस्ते दे॒वा अधि॑पतयोऽग्नि॒र्हे॒तीनां॑ प्रति॒धर्ता॑
त्रि॒वृत् त्वा स्तोमः॑ पृ॒थि॒व्या॒ श्रय॑त्वाज्य-मु॒क्थम॑व्यथयथ् स्त॒भ्नातु॑
रथ॑न्तर॒ साम॑ प्रति॒ष्ठित्यै॑ वि॒राड॑सि दक्षि॒णा दि॒गु॒द्रास्ते॑ दे॒वा
अधि॑पतय इन्द्रो हे॒तीनां॑ प्रति॒धर्ता पञ्च॑दशस्त्वा स्तोमः॑ पृ॒थि॒व्या॒
श्रय॑तु प्र-उगमु॒क्थम॑व्यथयथ् स्त॒भ्नातु॑ बृ॒हथ् साम॑ प्रति॒ष्ठित्यै॑
सम्रा॑डसि प्र॒तीची॒ दि- [] 4

TS 4.4.2.1 - Padam

रा॒ज्ञी॑ । अ॒सि । प्रा॒ची॑ । दिक् । व॒स॒वः । ते । दे॒वाः । अधि॑पतय
इत्य॑धि - प॒तयः॑ । अ॒ग्निः । हे॒तीनाम् । प्रति॑धर्तेति प्रति - धर्ता ।
त्रि॒वृदि॑ति त्रि-वृत् । त्वा । स्तोमः॑ । पृ॒थि॒व्याम् । श्रय॑तु । आ॒ज्यम् ।
उ॒क्थम् । अ॒व्यथ॑यत् । स्त॒भ्नातु॑ । रथ॑न्तरमिति रथं - तरम् ।
साम॑ । प्रति॒ष्ठित्या॒ इति॑ प्रति - स्थि॒त्यै । वि॒राडि॑ति वि - राट् ।
अ॒सि । दक्षि॑णा । दिक् । रु॒द्राः । ते । दे॒वाः । अधि॑पतय
इत्य॑धि - प॒तयः॑ । इन्द्रः॑ । हे॒तीनाम् । प्रति॑धर्तेति प्रति - धर्ता ।

पञ्चद॑श इति॑ पञ्च – द॒शः । त्वा । स्तोमः॑ । पृ॒थि॒व्याम् । श्रय॑तु ।
प्र उ॒गम् । उ॒क्थम् । अ॒व्यथ॑यत् । स्त॒भ्नातु॑ । बृ॒हत् । साम॑ ।
प्रति॑ष्ठित्या इति॑ प्रति – स्थि॒त्यै । स॒म्राडि॑ति सं – राट् ।
अ॒सि । प्र॒तीची॑ । दिक् । 4 (50)

TS 4.4.2.2

गादि॑त्यास्ते दे॒वा अधि॑पतयः सोमो॑ हे॒तीनां॑ प्रति॒धर्ता स॑प्तद॒शस्त्वा
स्तोमः॑ पृ॒थि॒व्याञ् श्रय॑तु मरु॒त्वती॑य-मु॒क्थम॑व्यथयत् स्त॒भ्नातु॑
वैरू॒पञ् साम॑ प्रति॑ष्ठित्यै स्वराड॒स्युदी॑ची दि॒ग्विश्वे॑ ते दे॒वा
अधि॑पतयो वरु॒णो हे॒तीनां॑ प्रति॒धर्ते॑ क॒विञ्श॑स्त्वा स्तोमः॑ पृ॒थि॒व्याञ्
श्रय॑तु मरु॒त्वती॑यमु॒क्थ-म॑व्यथयत् स्त॒भ्नातु॑ वैरू॒पञ् साम॑
प्रति॑ष्ठित्यायै स्वराड॒स्युदी॑ची दिग् विश्वे॑ ते दे॒वा अधि॑पतयो
वरु॒णः हे॒तीनाम्॑ प्रति॒धर्ते॑क॒विञ्श॑ स्त्वा स्तोमः॑ पृ॒थि॒व्याम्
श्रय॑तु निष्के॒वल्य-मु॒क्थम॑व्यथयत् स्त॒भ्नातु॑ वैराज॒ञ् साम॑ प्रति॑ष्ठित्या
अधि॑पत्यसि बृ॒हती॑ दिङ्मरु॒तस्ते॑ दे॒वा अधि॑पतयो – [] 5

TS 4.4.2.2 - Padam

आ॒दि॒त्याः । ते । दे॒वाः । अधि॑पतय॒ इत्यधि॑ – पत॒यः । सोमः॑ ।
हे॒तीनाम् । प्रति॑धर्तेति॒ प्रति – धर्ता॑ । सप्त॒दश॑ इति॒
सप्त – दशः॑ । त्वा । स्तोमः॑ । पृ॒थि॒व्याम् । श्रय॑तु । मरु॒त्वती॑यम् ॥
उक्थ॑म् । अव्य॑थयत् । स्त॒भ्नातु॑ । वैरू॒पम् । साम॑ । प्रति॑ष्ठित्या
इति॒ प्रति – स्थि॑त्यै । स्व॒राडि॑ति स्व – राट् । अ॒सि । उदी॑ची ।
दिक् । विश्वे॑ ॥ ते । दे॒वाः । अधि॑पतय॒ इत्यधि॑ – पत॒यः । वरु॑णः ।
हे॒तीनाम् । प्रति॑धर्तेति॒ प्रति – धर्ता॑ । एक॒विंश॑ इत्येक॒-विंशः॑ ।
त्वा । स्तोमः॑ । पृ॒थि॒व्याम् । श्रय॑तु । निष्के॑वल्यम् । उक्थ॑म् ।
अव्य॑थयत् । स्त॒भ्नातु॑ । वैरा॒जम् । साम॑ । प्रति॑ष्ठित्या इति॒
प्रति – स्थि॑त्यै । अधि॑प॒त्नीत्यधि॑ – प॒त्नी । अ॒सि । बृ॒हती॑ ।
दिक् । मरु॑तः । ते । दे॒वाः । अधि॑पतय॒ इत्यधि॑ – पत॒यः । 5 (50)

TS 4.4.2.3

बृ॒हस्प॑तिर्हे॒तीनां॑ प्रति॑धर्ता॒ त्रि॑णव॒त्रयस्त्रि॑ंशौ त्वा स्तोमौ॑
पृ॒थि॒व्याञ् श्रय॑तां वैश्व॑दे॒वाग्नि॑मारु॒ते उक्थे॑ अव्य॑थयन्ती स्त॒भ्नीताञ्

शा॒क्व॒रै॒व॒ते॒ सा॒म॒नी॒ प्र॒ति॒ष्ठि॒त्या॒ अ॒न्त॒रि॒क्षाय॑र्ष॒य॒स्त्वा॒ प्र॒थ॒म॒जा॒
दे॒वे॒षु॒ दि॒वो॒ मा॒त्र॒या॒ व॒रि॒णा॒ प्र॒थ॒न्तु॒ वि॒ध॒र्ता॒ चा॒य॒म॒धि॒प॒ति॒श्च॒
ते॒ त्वा॒ स॒र्वे॒ सँ॒वि॒दा॒ना॒ ना॒क॒स्य॒ पृ॒ष्ठे॒ सु॒व॒र्गे॒ लो॒के॒
य॒ज॒मा॒नं॒ च॒ सा॒द॒य॒न्तु॒ ॥ 6

TS 4.4.2.3 - Padam

बृ॒ह॒स्प॒तिः॑ । हे॒ती॒नाम् । प्र॒ति॒ध॒र्ते॒ति॑ प्र॒ति – ध॒र्ता॒ ।
त्रि॒ण॒व॒त्र॒य॒स्त्रि॒ं॒श॒वि॒ति॑ त्रि॒ण॒व – त्र॒य॒स्त्रि॒ं॒शौ॑ । त्वा॒ । स्तो॒मौ॑ ।
पृ॒थि॒व्याम् । श्र॒य॒ताम् । वै॒श्व॒दे॒वा॒ग्नि॒मा॒रु॒ते॑ इति॑ वै॒श्व॒दे॒व॒-आ॒ग्नि॒मा॒रु॒ते॑ ।
उ॒क्थे॑ इति॑ । अ॒व्य॒थ॒य॒न्ती॑ इति॑ । स्त॒भ्नी॒ताम् । शा॒क्व॒रै॒व॒ते॑ इति॑
शा॒क्व॒र – रै॒व॒ते॑ । सा॒म॒नी॒ इति॑ । प्र॒ति॒ष्ठि॒त्या॒ इति॑ प्र॒ति – स्थि॒त्यै॑ ।
अ॒न्त॒रि॒क्षाय॑ । ऋ॒ष॒यः॑ । त्वा॒ । प्र॒थ॒म॒जा॒ इति॑ प्र॒थ॒म – जाः॑ । दे॒वे॒षु॑ ।
दि॒वः॑ । मा॒त्र॒या॒ । व॒रि॒णा॒ । प्र॒थ॒न्तु॒ । वि॒ध॒र्ते॒ति॑ वि – ध॒र्ता॒ । च॒ ।
अ॒य॒म् । अ॒धि॒प॒ति॒रि॒त्य॒धि॒-प॒तिः॑ । च॒ । ते॒ । त्वा॒ । स॒र्वे॑ ।

सँ॒वि॒दा॒ना इति॑ सं – वि॒दा॒नाः । नाक॑स्य । पृ॒ष्ठे । सु॒वर्ग॑ इति॑
सुवः – गे । लो॒के । यज॑मानम् । च । सा॒दय॑न्तु ॥ 6 (40)

(प्र॒ती॒ची दिङ् – मरु॑तस्ते दे॒वा अधि॑पतय – श्र॒त्वा रि॒ञ्शच्च॑) (A2)

TS 4.4.3.1

अ॒यं पु॒रो ह॒रि॒केशः॑ सूर्य॑रश्मिस्तस्य॑ रथ॑गृ॒थ्सश्च॑ रथौ॑जाश्च से॒नानि॑
ग्रा॒म॒ण्यौ पु॒ज्जि॒कस्थ॑ला च कृ॒तस्थ॑ला चा॒प्सर॑सौ या॒तु॒धा॒ना हे॒ती
रक्षा॑ञ्सि प्रहे॑ति र॒यं दक्षि॑णा वि॒श्व क॑र्मा तस्य॑ रथ॑स्वनश्च
रथे॑चि॒त्रश्च॑ से॒नानि॑ ग्रा॒म॒ण्यौ मे॒नका॑ च स॒हज॑न्या चा॒प्सर॑सौ
द॒ङ्क्ष॒णवः॑ प॒शवो॑ हे॒तिः पौरु॑षेयो व॒धः प्रहे॑ति र॒यं प॒श्चाद् वि॒श्वव्य॑चा
स्तस्य॑ रथ॑ प्रो॒तश्चा॑-स॒मर॑थश्च से॒नानि॑ ग्रा॒म॒ण्यौ
प्र॒म्लो॑चन्ती चा – [] 7

TS 4.4.3.1 - Padam

अ॒यम् । पु॒रः । ह॒रि॒केश॑ इति॑ ह॒रि – केशः॑ । सूर्य॑रश्मि॒रिति॑
सूर्य॑ – रश्मिः॑ । तस्य॑ । रथ॑गृ॒थ्स इति॑ रथ – गृ॒थ्सः । च ।

रथौ॑ जा॒ इति॑ रथ॑ – ओ॒जाः । च॒ । से॒ना॒नि॒ग्रा॒म॒ण्य॑ा॒वि॒ति॑
से॒ना॒नि॒ – ग्रा॒म॒ण्यौ॑ । पु॒ञ्जि॒क॒स्थ॒ले॒ति॑ पु॒ञ्जि॒क॒ – स्थ॒ला । च॒ ।
कृ॒त॒स्थ॒ले॒ति॑ कृ॒त॒ – स्थ॒ला । च॒ । अ॒प्सर॒सौ॑ । या॒तु॒धा॒ना॒ इति॑
या॒तु॒ – धा॒नाः॑ । हे॒तिः । रक्षा॑सि॒ । प्र॒हे॒ति॒रि॒ति॒ प्र॒ – हे॒तिः । अ॒यम् ।
दक्षि॑णा । वि॒श्व॒क॒र्मे॒ति॑ वि॒श्व॒ – क॒र्मा॒ । तस्य॑ । रथ॒स्वन॑ इति॑
रथ॒ – स्वनः॑ । च॒ । रथे॑चि॒त्र॒ इति॑ रथे॑ – चि॒त्रः । च॒ ।
से॒ना॒नि॒ग्रा॒म॒ण्य॑ा॒वि॒ति॑ से॒ना॒नि॒ – ग्रा॒म॒ण्यौ॑ । मे॒न॒का । च॒ ।
सह॑ज॒न्ये॒ति॑ सह॑ – ज॒न्या । च॒ । अ॒प्सर॒सौ॑ । द॒ङ्क्ष॒ण॒वः । प॒श॒वः ।
हे॒तिः । पौ॒रु॒षे॒यः । व॒धः । प्र॒हे॒ति॒रि॒ति॒ प्र॒ – हे॒तिः । अ॒यम् । प॒श्चात् ।
वि॒श्व॒व्य॒चा॒ इति॑ वि॒श्व॒ – व्य॒चाः । तस्य॑ । रथ॒प्रो॒त॒ इति॑ रथ॒ – प्रो॒तः ।
च॒ । अ॒स॒म॒रथ॑ इत्य॒स॒म॒ – रथः॑ । च॒ । से॒ना॒नि॒ग्रा॒म॒ण्य॑ा॒वि॒ति॑
से॒ना॒नि॒ – ग्रा॒म॒ण्यौ॑ । प्र॒म्लो॒च॒न्ती॒ति॑ प्र॒ – म्लो॒च॒न्ती॑ । च॒ । 7 (50)

TS 4.4.3.2

नु॒म्लो॒च॒न्ती॒ – चा॒प्सर॒सौ॑ सर्पा॑ हे॒ति॑ व्या॒घ्राः प्र॒हे॒ति॑ रय॑ मु॒त्तरा॑थ्
संय॑द् – व॒सु॒स्तस्य॑ से॒न॒जि॒च्च॑ सु॒षे॒णश्च॑ से॒ना॒नि॒ ग्रा॒म॒ण्यौ॑ वि॒श्वा॒ची॑

च घृ॒ताची॑ चा॒प्सर॒सा वा॒पो हे॒ति वा॒तः प्र॒हेति॑ र॒यमु॒पर्य॑ वा॒ग्व-
सु॒स्तस्य॑ ता॒क्ष्य-श्वा॒रिष्ट॑-नेमि॒श्च से॒नानि॑ ग्रा॒मण्या॑ वु॒र्वशी॑ च
पूर्व॑चित्ति॒श्चा-प्सर॒सौ वि॒द्युद्धे॒तिर-व॒स्फूर्ज॑न् प्र॒हेति॑ स्ते॒भ्यो
नम॒स्ते नो॑ मृ॒डय॑न्तु ते यं - [] 8

TS 4.4.3.2 - Padam

अ॒नु॒म्लो॒चन्ती॑त्यनु - म्लो॒चन्ती॑ । च । अ॒प्सर॒सौ । सर्पाः॑ । हे॒तिः ।
व्या॒घ्राः । प्र॒हेति॑रिति प्र - हे॒तिः । अ॒यम् । उ॒त्तरा॑दित्युत्-तरात् ।
सँय॑द्वसु॒रिति॑ सँयत् - वसुः॑ । तस्य॑ । से॒नजि॑दिति से॒न-जि॑त् ।
च । सु॒षेण॑ इति सु - से॒नः । च । से॒नानि॑ग्रा॒मण्या॑विति॑
से॒नानि॑ - ग्रा॒मण्या॑ । वि॒श्वाची॑ । च । घृ॒ताची॑ । च । अ॒प्सर॒सौ ।
आपः॑ । हे॒ति । वा॒तः । प्र॒हेति॑रिति प्र - हे॒तिः । अ॒यम् । उ॒परि॑ ।
अ॒र्वाग्व॑सु॒रित्य॑र्वाक् - वसुः॑ । तस्य॑ । ता॒क्ष्यः । च ।
अ॒रिष्ट॑नेमि॒रित्य॑रिष्ट - नेमिः॑ । च । से॒नानि॑ग्रा॒मण्या॑विति॑
से॒नानि॑ - ग्रा॒मण्या॑ । उ॒र्वशी॑ । च । पूर्॒वचि॑त्तिरिति पूर्॒व - चि॒त्तिः ।

च । अ॒प्सर॒सौ । वि॒द्यु॒दि॒ति॒ वित् – युत् । हे॒तिः ।

अ॒व॒स्फूर्ज॒न्नित्य॑व – स्फूर्ज॒न् । प्र॒हे॒ति॒रि॒ति॒ प्र – हे॒तिः । ते॒भ्यः ।

नमः । ते । नः । मृ॒ड॒य॒न्तु । ते । यम् । 8 (50)

TS 4.4.3.3

द्वि॒ष्मो यश्च॑ नो॒ द्वेष्टि॑ तं वो॒ जंभे॑ द॒धाम्या॑योस्त्वा॒ स॒दने॑ सा॒दया॑म्यव॒त

इ॒च्छाया॑यां नमः॒ समु॒द्राय॑ नमः॒ समु॒द्रस्य॑ चक्ष॒से पर॑मेष्ठी त्वा सा॒दय॑तु

दि॒वः पृ॒ष्ठे व्य॑च॒स्वतीं॑ प्र॒थ॒स्वतीं॑ वि॒भूम॑तीं प्र॒भूम॑तीं परि॒भूम॑तीं दि॒वं

य॑च्छ दि॒वं दृ॒ह दि॒वं मा हि॑सीर्वि॒श्वस्मै॑ प्रा॒णाया॑पानाय

व्या॒नायो॑दा॒नाय॑ प्रति॒ष्ठायै॑ च॒रित्रा॑य सूर्य॒स्त्वा॒भि पा॑तु म॒ह्या स्व॒स्त्या

() छ॒र्दिषा॑ श॒न्तमे॑न॒ तया॑ दे॒वतया॑ङ्गि॒रस्वद्-ध्रु॑वा सीद ॥

प्रो॒थद॑श्चो न यव॒से अ॒विष्य॑न् यदा॒ महः॑ स॒व॒रणा॑द् व्य॒स्थात् ।

आ॒दस्य॑ वा॒तो अनु॑ वाति शो॒चिर॑ध॒ स्म ते॒ व्रज॑नं कृ॒ष्णम॑स्ति ॥ 9

TS 4.4.3.3 - Padam

द्वि॒ष्मः । यः । च । नः । द्वेष्टि॑ । तम् । वः । जंभे॑ । द॒धामि॑ ।

आ॒योः । त्वा । स॒दने॑ । सा॒दया॑मि । अ॒वतः॑ । छा॒याया॑म् । नमः ।

समु॒द्राय॑ । नमः॑ । समु॒द्रस्य॑ । चक्ष॑से । पर॒मेष्ठी॑ । त्वा । सा॒दय॑तु ।
दिवः॑ । पृ॒ष्ठे । व्यच॑स्वतीम् । प्रथ॑स्वतीम् । वि॒भूम॑तीमिति॑
वि – भूम॑तीम् । प्र॒भूम॑तीमिति॑ प्र – भूम॑तीम् । परि॒भूम॑तीमिति॑
परि – भूम॑तीम् । दि॒वम् । यच्छ॑ । दि॒वम् । दृ॒ह । दि॒वम् । मा ।
हि॒सीः । विश्व॑स्मै । प्रा॒णाय॑ति प्र – अ॒नाय॑ ।
अ॒पा॒नाये॑त्यप – अ॒नाय॑ । व्या॒नाये॑ति वि – अ॒नाय॑ ।
उ॒दा॒नाये॑त्युत् – अ॒नाय॑ । प्र॒ति॒ष्ठाया॑ इति॑ प्र॒ति – स्था॑यै । च॒रि॒त्राय॑ ।
सूर्यः॑ । त्वा । अ॒भीति॑ । पा॒तु । म॒ह्या । स्व॒स्त्या () । छ॒र्दिषा॑ ।
श॒न्तमे॑नेति॑ शं – तमे॑न । तया॑ । दे॒वत॑या । अ॒ङ्गिर॑स्वत् । ध्रु॒वा ।
सीद॑ ॥ प्रोथ॑त् । अ॒श्वः । न । यव॑से । अ॒विष्य॑न् । यदा॑ । म॒हः ।
सँव॑रणादिति॑ सं – व॒रणा॑त् । व्य॒स्था॑दिति॑ वि – अ॒स्था॑त् ॥ आत् ।
अ॒स्य । वातः॑ । अ॒न्विति॑ । वा॒ति । शो॒चिः । अध॑ । स्म । ते ।
व्र॒जन॑म् । कृ॒ष्णम् । अ॒स्ति ॥ ९ (78)

(प्र॒म्लोच॑न्ती च – य॒ – स्व॒स्त्या – ऽष्टा॑वि॒ंशति॑श्च) (A3)

TS 4.4.4.1

अ॒ग्नि॒र्मू॒र्धा दि॒वः क॒कुत् प॒तिः पृ॒थि॒व्या अ॒यं ।
अपा॑ꣳ रेता॑ꣳसि जि॒न्वति ॥
त्वा॒मग्ने॑ पु॒ष्करा॑द॒ध्यथ॑र्वा नि॒रम॑न्थत ।
मू॒र्ध्नो वि॒श्वस्य॑ वा॒घतः ॥
अ॒यम॒ग्निः स॒हस्रि॑णो वा॒जस्य॑ श॒तिन॑स्पतिः ।
मू॒र्धा क॒वी रयी॑णां ॥
भुवो॑ य॒ज्ञस्य॑ र॒जसश्च॑ ने॒ता यत्रा॑ नि॒युद्धिः॑ स॒चसे॑ शि॒वाभिः॑ ।
दि॒वि मू॒र्धानं॑ दधि॒षे सुव॑र्षां जि॒ह्वा॒मग्ने॑ च॒कृषे॑ ह॒व्यवा॑हं ॥
अ॒बा॒द्ध्य॒ग्निः स॒मि॒धा ज॒नानां॑ – [] 10

TS 4.4.4.1 - Padam

अ॒ग्निः । मू॒र्धा । दि॒वः । क॒कुत् । प॒तिः । पृ॒थि॒व्याः । अ॒यम् ॥
अ॒पाम् । रेता॑ꣳसि । जि॒न्वति ॥ त्वा॒म् । अ॒ग्ने । पु॒ष्करा॑त् । अ॒धीति॑ ।
अथ॑र्वा । नि॒रिति॑ । अ॒मन्थ॑त ॥ मू॒र्ध्नः । वि॒श्वस्य॑ । वा॒घतः ॥
अ॒यम् । अ॒ग्निः । स॒हस्रि॑णः । वा॒जस्य॑ । श॒तिनः॑ । प॒तिः ॥ मू॒र्धा ।

क॒विः । र॒यी॒णाम् ॥ भु॒वः । य॒ज्ञस्य॑ । र॒जसः॑ । च॒ । ने॒ता । य॒त्र ।
नि॒यु॒द्धि॒रिति॑ नि॒युत् – भिः॑ । स॒च॒से । शि॒वाभिः॑ ॥ दि॒वि ।
मू॒र्धा॒नम् ॥ द॒धि॒षे । सु॒वर्षा॑मिति॑ सु॒वः – सा॒म् । जि॒ह्वाम् ।
अ॒ग्ने । च॒कृ॒षे । ह॒व्यवा॑हमिति॑ ह॒व्य – वा॒हम् ॥ अ॒बो॒धि । अ॒ग्निः ।
स॒मि॒धेति॑ स॒म् – इ॒धा ॥ ज॒नाना॑म् । 10 (50)

TS 4.4.4.2

प्र॒ति धे॒नुमि॑वा य॒तीमु॒षासं॑ ॥
य॒ह्वा इ॒व प्र॒वया॑ मु॒ज्जि॒हानाः॑ प्र॒ भान॑वः सि॒स्रते॑ ना॒कम॒च्छ ॥
अ॒वो॒चाम॑ क॒वये॑ मे॒द्ध्या॑य व॒चो व॒न्दारु॑ वृष॒भाय॑ वृ॒ष्णौ ।
ग॒वि॒ष्ठि॒रो न॑म॒सा स्तो॑मम॒ग्नौ दि॒वीव॑ रु॒क्ममु॒र्व्यञ्च॑म॒श्रेत् ॥
ज॒नस्य॑ गो॒पा अ॒जनि॑ष्ट जा॒गृवि॑र॒ग्निः सु॒दक्षः॑ सु॒वि॒ताय॑ न॒व्यसे॑ ।
घृ॒तप्र॑ती॒को बृ॒हता॑ दि॒विस्पृ॑शा द्यु॒मद्वि॑ भा॒ति भ॒रते॑भ्यः शु॒चिः ॥
त्वा॒म॒ग्ने अ॒ङ्गिर॑सो – [] 11

TS 4.4.4.2 - Padam

प्र॒तीति॑ । धे॒नुम् । इ॒व । आ॒य॒ती॒मि॒त्या॑ – य॒तीम् । उ॒षा॑सम् ॥ य॒ह्वाः ।
इ॒व । प्रेति॑ । व॒याम् । उ॒ज्जि॒हाना॑ इत्युत् – जि॒हानाः॑ । प्रेति॑ ।
भा॒नवः॑ । सि॒स्र॒ते । ना॒कम् । अ॒च्छ ॥ अ॒वो॒चाम् । क॒वयै॑ ।
मे॒द्ध्या॑य । व॒चः । व॒न्दारु॑ । वृ॒षभा॑य । वृ॒ष्णौ ॥ ग॒वि॒ष्ठिरः॑ । न॒म॒सा ।
स्तो॒मम् । अ॒ग्नौ । दि॒वि । इ॒व । रु॒क्म॑म् । उ॒र्व्यञ्च॑म् । अ॒श्रेत् ॥
ज॒न॒स्य । गो॒पा इति॑ गो – पाः । अ॒ज॒नि॒ष्ट । जा॒गृ॒विः । अ॒ग्निः ।
सु॒दक्ष॑ इति॑ सु – दक्षः । सु॒वि॒ताय॑ । न॒व्य॒से ॥ घृ॒त॒प्र॒तीक॑ इति॑
घृ॒त – प्र॒तीकः॑ । बृ॒ह॒ता । दि॒वि॒स्पृ॒शेति॑ दि॒वि – स्पृ॒शा॑ ।
द्यु॒म॒दि॒ति द्यु॑ – म॒त् । वी॒ति । भा॒ति । भ॒र॒ते॒भ्यः । शु॒चिः ॥ त्वा॒म् ।
अ॒ग्ने । अ॒ङ्गि॒र॒सः । 11 (50)

TS 4.4.4.3

गु॒हा हि॒त॒म॒न्व-वि॒न्द॒ञ्छि॒श्रि॒या॒णं व॑ने॒वने॑ ।
स जा॒य॒से म॒थ्य॒मा॒नः स॒हो म॒हत् त्वा॒मा॒हुः स॒ह॒स॒स्पु॒त्र॒म॒ङ्गि॒रः ॥
य॒ज्ञ॒स्य॑ के॒तुं प्र॒थ॒मं पु॒रो॒हि॒त॒म॒ग्निं न॑र॒स्त्रि॒ष॒ध॒स्थे स॑मि॒न्ध॒ते ।

इ॒न्द्रेण॑ दे॒वैः स॒रथ॑ꣳ स ब॒र्हिषि॑ सीद॒न्नि॑ होता॑ य॒जथा॑य सु॒क्रतुः॑ ॥

त्वां चि॒त्रश्र॑वस्तम॒ हव॑न्ते वि॒क्षु ज॑न्तवः ।

शोचि॑ष्केशं॒ पुरु॑प्रियाग्ने॒ हव्या॑य वोढ॑वे ॥

सखा॑यः सँवः॑ स॒म्यञ्च॑मिषꣳ – [] 12

TS 4.4.4.3 - Padam

गुहा॑ । हि॒तम् । अ॒न्विति॑ । अ॒वि॒न्दन् । शि॒श्रि॒याण॑म् । वने॑वन॒ इति॑

वने॑ – वने॑ ॥ सः । जा॒यसे॑ । म॒थ्यमा॑नः । स॒हः । म॒हत् । त्वा॑म् ।

आहुः॑ । स॒हसः॑ । पु॒त्रम् । अ॒ङ्गिरः॑ ॥ य॒ज्ञस्य॑ । के॒तुम् । प्र॒थम॑म् ।

पु॒रोहि॑तमि॒ति पु॒रः – हि॒तम् । अ॒ग्निम् । नरः॑ । त्रि॒षध॑स्थ इति॑

त्रि – स॒धस्थे॑ । स॒मिति॑ । इ॒न्धते॑ ॥ इ॒न्द्रेण॑ । दे॒वैः । स॒रथ॑मि॒ति

स – रथ॑म् । सः । ब॒र्हिषि॑ । सीद॑त् । नीति॑ । होता॑ । य॒जथा॑य ।

सु॒क्रतु॑रिति॑ सु – क्रतुः॑ ॥ त्वा॑म् । चि॒त्रश्र॑वस्तमेति॑ चि॒त्रश्र॑वः-तम॑ ।

हव॑न्ते । वि॒क्षु । ज॑न्तवः ॥ शोचि॑ष्केशमि॒ति शोचिः॑ – के॒शम् ।

पुरु॑प्रि॒येति॑ पुरु॑ – प्रि॒य । अ॒ग्ने॑ । ह॒व्याय॑ । वोढ॑वे ॥ सखा॑यः ।
समि॑ति । वः॑ । स॒म्यञ्च॑म् । इ॒षम् । 12 (50)

TS 4.4.4.4

स्तो॑मं चा॒ग्नये॑ ।
वर्षि॑षाय॒ क्षिती॑नामूर्जो॒ नप्त्रे॑ सह॒स्वते॑ ॥
स॒समि॑द्युवसे वृष॒न्नग्ने॑ विश्वा॒न्यर्य॑ आ ।
इ॒डस्प॑दे समि॒द्ध्यसे॑ स नो॒ वसू॑न्या भर ॥
ए॒ना वो॑ अ॒ग्निं नम॑सोर्जो॒ नपा॑तमा हु॒वे ।
प्रि॒यं चेति॑ष्ठमरति॒ स्व॒ध्वरं॑ विश्व॒स्य दू॒तम॑मृतं ॥
स यो॑जते अ॒रुषो॑ विश्व॒भोज॑सा स दु॒द्रव॑थ् स्वाहु॒तः ।
सु॒ब्रह्मा॑ य॒ज्ञः सु॒शमी॑ – [] 13

TS 4.4.4.4 - Padam

स्तो॑मम् । च॒ । अ॒ग्नये॑ ॥ वर्षि॑षाय । क्षि॒तीना॑म् । ऊ॒र्जः । न॒प्त्रे॑ ।
सह॒स्वते॑ ॥ स॒समि॑ति॒ सम् – सम्॑ । इत् । यु॒वसे॑ । वृष॒न् ।
अ॒ग्ने॑ । विश्वा॑नि । अ॒र्यः । आ ॥ इ॒डः । प॒दे । समि॑ति । इ॒द्ध्यसे॑ ।

सः । नः । वसू॑नि । ए॒ति । भ॒र ॥ ए॒ना । वः । अ॒ग्निम् । नम॑सा ।
ऊ॒र्जः । नपा॑तम् । ए॒ति । हु॒वे ॥ प्रि॒यम् । चे॒तिष्ठ॑म् । अ॒रति॑म् ।
स्व॒ध्व॒रमि॑ति सु – अ॒ध्व॒रम् । वि॒श्वस्य॑ । दू॒तम् । अ॒मृत॑म् ॥ सः ।
यो॒ज॒ते । अ॒रुषः॑ । वि॒श्वभो॑ज॒सेति॑ वि॒श्व – भो॒ज॒सा । सः । दु॒द्रव॑त् ।
स्वा॒हु॒त इति॑ सु – आ॒हु॒तः ॥ सु॒ब्र॒ह्मेति॑ सु – ब्र॒ह्मा ॥ य॒ज्ञः ।
सु॒शमी॑ति सु – श॒मी ॥ 13 (50)

TS 4.4.4.5

वसू॑नां दे॒वꣳ रा॒धो ज॒नानां॑ ॥
उद॑स्य शोचि॒रस्था॑दा-जु॒ह्वान॑स्य मी॒ढुषः॑ ।
उ॒धूमा॑सो अ॒रुषा॑सो दि॒विस्पृ॑शः स॒मग्नि॑मि॒न्धते॑ न॒रः ॥
अ॒ग्ने वा॒जस्य॑ गो॒मत॑ ई॒शानः॑ स॒हसो॑ य॒हो ।
अ॒स्मे धे॑हि जा॒तवे॑दो म॒हि श्र॑वः ॥
स इ॒धानो॑ वसु॒ष्कवि॑-र॒ग्निरी॒डेन्यो॑ गि॒रा ।
रे॒वद॑स्मभ्यं पु॒र्वणी॑क दी॒दिहि॑ ॥

क्ष॒पो॑ रा॒जन्नु॑त त्मना॒ग्ने॑ वस्तो॒रुतो॑षसः ।

स ति॒ग्मजं॑भ – [] 14

TS 4.4.4.5 - Padam

वसू॑नाम् । दे॒वम् । रा॒धः । जना॑नाम् ॥ उ॒दि॒ति॑ । अ॒स्य॑ । शो॒चिः॑ ।
अ॒स्था॒त् । आ॒जु॒ह्वा॒नस्ये॒त्या॑ – जु॒ह्वा॒नस्य॑ । मी॒ढुषः॑ ॥ उ॒दि॒ति॑ ।
धू॒मासः॑ । अ॒रु॒षासः॑ । दि॒वि॒स्पृ॒श इति॑ दि॒वि – स्पृ॒शः॑ । स॒मि॒ति॑ ।
अ॒ग्नि॒म् । इ॒न्ध॒ते॑ । नरः॑ ॥ अ॒ग्ने॑ । वा॒जस्य॑ । गो॒म॒त इति॑ गो॒-म॒तः॑ ।
ई॒शा॒नः । स॒ह॒सः॑ । य॒हो इति॑ ॥ अ॒स्मे इति॑ । धे॒हि॑ । जा॒तवे॑द इति॑
जा॒त – वे॒दः॑ । म॒हि॑ । श्र॒वः॑ ॥ सः॑ । इ॒धा॒नः॑ । वसुः॑ । क॒विः॑ ।
अ॒ग्निः॑ । ई॒डे॒न्यः॑ । गि॒रा ॥ रे॒वत् । अ॒स्मभ्य॑मि॒त्यस्म॑ – भ्य॒म् ।
पु॒र्व॒णी॒केति॑ पु॒रु-अ॒नी॒क॑ । दी॒दि॒हि ॥ क्ष॒पः॑ । रा॒जन् । उ॒त । त्मना॑ ॥
अ॒ग्ने॑ । वस्तोः॑ । उ॒त । उ॒षसः॑ ॥ सः॑ ।
ति॒ग्मजं॑भेति॑ ति॒ग्म – जं॑भ । 14 (50)

TS 4.4.4.6

र॒क्ष॒सो॑ द॒ह॒ प्र॒ति॑ ॥

आ ते॑ अ॒ग्न इ॒धी॒महि॑ द्यु॒मन्तं॑ दे॒वाज॑रं ।

यद्ध॑ स्या ते॑ पनी॒यसी॑ स॒मिद्-दी॑दयति द्यवी॒षः॑ स्तो॒तृभ्य॑ आ भ॒र ॥

आ ते॑ अ॒ग्न ऋ॒चा ह॒विः शु॒क्रस्य॑ ज्योतिषस्पते ।

सु॒श्चन्द्र॑ दस्म॒ वि॒श॒पते॑ हव्यवा॒ट् तु॒भ्यः॑ हूयत इ॒षः॑ स्तो॒तृभ्य॑

आ भ॒र ॥

उ॒भे सु॒श्चन्द्र॑ सर्पि॒षो द॒र्वी॑ श्रीणीष आ॒सनि॑ ।

उ॒तो न॒ उत् पु॒पूर्वा- [] 15

TS 4.4.4.6 - Padam

र॒क्ष॒सः॑ । द॒ह॒ । प्र॒ति॑ ॥ ए॒ति॑ । ते॒ । अ॒ग्ने॒ । इ॒धी॒महि॑ । द्यु॒मन्त॑मिति॒

द्यु - मन्त॑म् । दे॒व॒ । अ॒ज॒रम् ॥ यत् । ह॒ । स्या॒ । ते॒ । पनी॑यसी ।

स॒मिदि॑ति सं - इत् । दी॒दय॑ति । द्य॒वि॒ । इ॒षम् । स्तो॒तृभ्य॑ इति॒

स्तो॒तृ - भ्यः॑ । ए॒ति॑ । भ॒र ॥ ए॒ति॑ । ते॒ । अ॒ग्ने॒ । ऋ॒चा॒ । ह॒विः॑ ।

शु॒क्रस्य॑ । ज्यो॒तिषः॑ । प॒ते ॥ सु॒श्चन्द्रे॑ति सु-चन्द्र॑ । दस्म॑ । वि॒श॒पते॑ ।

हव्य॑वा॒डि॒ति॒ हव्य॑ – वा॒ट् । तु॒भ्यम्॑ । हू॒य॒ते॑ । इ॒षम्॑ । स्तो॒तृ॒भ्य॑ इति॑
स्तो॒तृ – भ्यः॑ । ए॒ति॑ । भ॒र ॥ उ॒भे इति॑ । सु॒श्च॒न्द्रे॒ति॑ सु – च॒न्द्र ।
स॒र्पि॒षः । द॒र्वी इति॑ । श्री॒णी॒षे । आ॒स॒नि ॥ उ॒तो इति॑ । नः॑ । उ॒दि॒ति॑ ।

पु॒पू॒र्याः । 15 (50)

TS 4.4.4.7

उ॒क्थे॑षु श॒वस॑स्प॒त इ॒षः स्तो॒तृ॒भ्य॑ आ भ॒र ॥
अ॒ग्ने त॒मद्या॑श्चं न स्तो॒मैः क्र॒तुं न भ॒द्रं ह॒दि॒स्पृ॒शं ।
ऋ॒द्ध्य॑मा त ओ॒हैः ॥
अ॒धा ह्य॒ग्ने क्र॒तौर्भ॒द्रस्य॑ दक्ष॑स्य सा॒धोः ।
र॒थीर्ऋ॒तस्य॑ बृ॒हतो॑ ब॒भूथ॑ ॥
आ॒भि॒ष्टे अ॒द्य गी॒र्भिर्गृ॑ण॒न्तो॒ऽग्ने दा॑शेम ।
प्र ते॑ दि॒वो न स्त॑नयन्ति शु॒ष्माः ॥
ए॒भिर्नो॑ अ॒र्केर्भ॒वा नो अ॒र्वाङ्ग् – [] 16

TS 4.4.4.7 - Padam

उक्थे॑षु । श॒वसः॑ । प॒ते । इ॒षम् । स्तो॒तृभ्य॑ इति॑ स्तो॒तृ - भ्यः॑ ।
एति॑ । भ॒र ॥ अ॒ग्ने॑ । तम् । अ॒द्य । अ॒श्वम् । न । स्तो॒मैः॑ । क्र॒तुम् ।
न । भ॒द्रम् । ह॒दिस्पृ॑शमिति॑ ह॒दि - स्पृ॑शम् ॥ ऋ॒द्ध्याम् । ते ।
ओ॒हैः॑ ॥ अ॒ध । हि । अ॒ग्ने॑ । क्र॒तौः॑ । भ॒द्रस्य॑ । दक्ष॑स्य । सा॒धोः॑ ॥
र॒थीः । ऋ॒तस्य॑ । बृ॒हतः॑ । ब॒भूथ॑ ॥ आ॒भिः । ते । अ॒द्य । गी॒र्भिः ।
गृ॒णन्तः॑ । अ॒ग्ने॑ । दा॒शेम॑ ॥ प्रेति॑ । ते । दि॒वः । न । स्त॒नय॑न्ति ।
शु॒ष्माः॑ ॥ ए॒भिः । नः॑ । अ॒र्कैः॑ । भ॒व । नः॑ । अ॒र्वाङ् । 16 (50)

TS 4.4.4.8

सु॒वर्न॑ ज्योतिः॑ ।
अ॒ग्ने॑ वि॒श्वेभिः॑ सु॒मना॑ अ॒नीकैः॑ ॥
अ॒ग्नि॑ꣳ हो॒तारं॑ म॒न्ये दा॑स्वन्तं॒ वसोः॑ स॒नूꣳ स॒हसो॑ जा॒तवे॑दसं ।
वि॒प्रं न जा॑तवे॒दसं॑ ।
य ऊ॒र्ध्वया॑ स्व॒र्ध्वरो॑ दे॒वो दे॒वाच्या॑ कृ॒पा ।
घृ॒तस्य॑ वि॒भ्राष्टि॑मनु शु॒क्रशो॑चिष आ॒जुह्वा॑नस्य स॒र्पिषः॑ ॥

अ॒ग्ने॒ त्वं॒ नो॒ अ॒न्त॒मः॑ ।

उ॒त त्रा॒ता शि॒वो भ॒व व॒रू॒थ्यः॑ ॥

तं॒ त्वा शो॒चि॒ष्ठ दी॒दिवः॑ ।

सु॒म्नाय॑ नू॒नमी॑महे॒ सखि॑भ्यः ॥

व॒सु॒र॒ग्निर्व॑सु॒श्रवाः॑ () ।

अ॒च्छा नक्षि॑ द्यु॒मत्त॑मो र॒यिं दाः॑ ॥ 17

TS 4.4.4.8 - Padam

सु॒वः । न । ज्यो॒तिः॑ ॥ अ॒ग्ने॑ । वि॒श्वे॑भिः । सु॒म॒ना इति॑ सु – म॒नाः॑ ।

अ॒नी॒कैः॑ ॥ अ॒ग्नि॑म् । हो॒ता॒रम् । म॒न्ये । दा॒स्व॒न्त॒म् । व॒सोः॑ । सू॒नुम् ।

सह॑सः । जा॒तवे॑द॒समि॑ति जा॒त – वे॒द॒सम् ॥ वि॒प्रम् । न ।

जा॒तवे॑द॒समि॑ति जा॒त – वे॒द॒सम् ॥ यः । ऊ॒र्ध्व॒या । स्व॒ध्व॒र इति॑

सु – अ॒ध्व॒रः । दे॒वः । दे॒वा॒च्या । कृ॒पा ॥ घृ॒त॒स्य । वि॒भ्रा॒ष्टि॒मिति॑

वि – भ्रा॒ष्टि॒म् । अ॒न्वि॑ति । शु॒क्रशो॑चिष इति शु॒क्र – शो॒चि॒षः ।

आ॒जु॒ह्वान॑स्ये॒त्या – जु॒ह्वान॑स्य । सर्पि॑षः ॥ अ॒ग्ने॑ । त्वम् । नः ।

अ॒न्त॒मः ॥ उ॒त । त्रा॒ता । शि॒वः । भ॒व । व॒रू॒थ्यः ॥ तम् । त्वा ।
शो॒चि॒ष्ठ । दी॒दि॒वः ॥ सु॒म्ना॒य । नू॒नम् । ई॒म॒हे । स॒खि॒भ्य॒ इति॒
स॒खि॒ – भ्यः ॥ व॒सुः । अ॒ग्निः । व॒सु॒श्र॒वा इति॒ व॒सु – श्र॒वाः () ॥
अ॒च्छ । न॒क्षि । द्यु॒म॒त्त॒म इति॒ द्यु॒म॒त् – त॒मः । र॒यि॒म् । दाः ॥ 17 (55)
(ज॒ना॒ना – म॒ङ्गि॒र॒स – इ॒ष॒ – सु॒श॒मी – ति॒ग्म॒जं॒भ – पु॒पू॒र्या –
अ॒वा॒ङ् – व॒सु॒श्र॒वाः – प॒ञ्च॒ च) (A4)

TS 4.4.5.1

इ॒न्द्रा॒ग्नि॒भ्यां॑ त्वा स॒यु॒जा॒ यु॒जा॒ यु॒न॒ज्म्या॑ घा॒रा॒भ्यां॑ ते॒ज॒सा॒ वर्च॑सो
क्थे॒भिः॑ स्तो॒मे॒भि॒ इ॒च्छ॒न्दो॑भी र॒य्यै पो॑षाय स॒जा॒ता॒नां॑ म॒द्ध्य॒म॒स्थे॒या॒य॒
मया॑ त्वा स॒यु॒जा॒ यु॒जा॒ यु॒न॒ज्म्यं॑बा दु॒ला नि॒त॒न्नि र॒भ्र॒य॒न्ती॑ मे॒घ॒य॒न्ती॑
व॒र्ष॒य॒न्ती॑ चु॒पु॒णी॒का॒ ना॒मा॒सि॑ प्र॒जा॒प॒ति॒ना॒ त्वा वि॒श्वा॒भि॒र्द्धी॒भि॒रु॒प॑
द॒धा॒मि॑ पृ॒थि॒व्यु॒द॒पु॒र॒म॒न्ने॒न वि॒ष्टा॑ म॒नु॒ष्या॑स्ते गो॒प्ता॒रो ऽग्नि॑र्वि॒य॒त्तो॒ऽस्यां॑
ता॒म॒हं प्र॑ प॒द्ये सा – [] 18

TS 4.4.5.1 - Padam

इन्द्रा॑ग्निभ्या॒मितीन्द्रा॑ग्नि - भ्याम् । त्वा । स॒युजे॑ति स - युजा॑ ।
युजा । यु॒नज्मि॑ । आ॒घारा॑भ्या॒मित्या॑-घारा॑भ्याम् । तेज॑सा । वर्च॑सा ।
उक्थे॑भिः । स्तोमे॑भिः । छन्दो॑भिरिति छन्दः - भिः । र॒य्यै । पोषा॑य ।
स॒जा॒ता॒ना॒मिति॑ स-जा॒ता॒नाम् ।
म॒द्ध्य॒म॒स्थेया॑येति म॒द्ध्य॒म-स्थेया॑य । मया॑ । त्वा ।
स॒युजे॑ति स-युजा॑ । युजा । यु॒नज्मि॑ । अ॒न्बा । दु॒ला । नि॒त॒न्निरिति॑
नि - त॒न्निः । अ॒भ्रय॑न्ती । मे॒घय॑न्ती । व॒र्षय॑न्ती । चु॒पु॒णीका॑ ।
नाम॑ । अ॒सि । प्र॒जाप॑तिनेति प्र॒जा - प॒तिना॑ । त्वा । वि॒श्वाभिः॑ ।
धी॒भिः । उपे॑ति । द॒धामि॑ । पृ॒थि॒वी । उ॒द॒पु॒र॒मित्यु॑द - पु॒रम् ।
अ॒न्नेन॑ । वि॒ष्टा । म॒नु॒ष्याः । ते । गो॒प्तारः॑ । अ॒ग्निः । वि॒य॒त्त इति॑
वि - य॒त्तः । अ॒स्याम् । ताम् । अ॒हम् । प्रेति॑ । प॒द्ये । सा । 18 (50)

TS 4.4.5.2

मे श॑र्म च॒ वर्म॑ चा॒स्त्वधि॑ द्यौर॒न्तरि॑क्षं ब्र॒ह्म॒णा वि॒ष्टा म॒रुत॑स्ते
गो॒प्तारो॑ वा॒युर्वि॑य॒त्तोऽस्यां॑ ताम॒हं प्र॑ प॒द्ये सा मे श॑र्म च॒ वर्म॑ चा॒स्तु

द्वौ॑रपराजिता॑ऽमृतेन॑ वि॒ष्टाऽऽदि॒त्यास्ते॑ गो॒प्तारः॑ सूर्यो॑ वि॒यत्तो॑ऽस्यां
ताम॑हं प्र प॒द्ये सा मे॑ शर्म॑ च॒ वर्म॑ चास्तु ॥ 19

TS 4.4.5.2 - Padam

मे । शर्म॑ । च॒ । वर्म॑ । च॒ । अस्तु॑ । अधि॑द्वौरित्यधि॑ – द्वौः ।
अ॒न्तरि॑क्षम् । ब्र॒ह्मणा॑ । वि॒ष्टा । म॒रुतः॑ । ते । गो॒प्तारः॑ । वा॒युः ।
वि॒यत्त॑ इति॒ वि – य॒त्तः । अ॒स्याम् । ताम् । अ॒हम् । प्रेति॑ ।
प॒द्ये । सा । मे॑ । शर्म॑ । च॒ । वर्म॑ । च॒ । अस्तु॑ । द्वौः ।
अ॒पराजि॑तेत्यपरा – जि॒ता । अ॒मृतेन॑ । वि॒ष्टा । आ॒दि॒त्याः । ते ।
गो॒प्तारः॑ । सूर्यः॑ । वि॒यत्त॑ इति॒ वि-य॒त्तः । अ॒स्याम् । ताम् । अ॒हम् ।
प्रेति॑ । प॒द्ये । सा । मे॑ । शर्म॑ । च॒ । वर्म॑ । च॒ । अस्तु॑ ॥ 19 (48)

(सा – ऽष्टाच॑त्वारि॒ंशच्च॑) (A5)

TS 4.4.6.1

बृ॒हस्प॑तिस्त्वा सादयतु पृ॒थिव्याः॑ पृ॒ष्ठे ज्योति॑ष्मतीं॒ विश्व॑स्मै
प्रा॒णाय॑पा॒नाय॑ विश्वं॒ ज्योति॑र्यच्छा – ग्निस्ते॑ऽधिपति॒ विश्व॑कर्मा॒ त्वा
सादय॑त्वन्तरि॒क्षस्य॑ पृ॒ष्ठे ज्योति॑ष्मतीं॒ विश्व॑स्मै प्रा॒णाय॑पा॒नाय॑ विश्वं

ज्योति॑र्यच्छ वा॒युस्तेऽधि॑पतिः प्र॒जाप॑तिस्त्वा सादयतु दि॒वः पृ॒ष्ठे
ज्योति॑ष्मतीं विश्व॑स्मै प्रा॒णाया॑पानाय विश्वं ज्योति॑र्यच्छ परमे॒ष्टी
तेऽधि॑पतिः पु॒रोवा॑त॒सनिर॑स्य भ्र॒सनिर॑सि वि॒द्युत्स॑नि – [] 20

TS 4.4.6.1 - Padam

बृ॒हस्प॑तिः । त्वा । सा॒दय॑तु । पृ॒थिव्याः । पृ॒ष्ठे । ज्योति॑ष्मतीम् ।
विश्व॑स्मै । प्रा॒णाय॑ति प्र-अ॒नाय । अ॒पाना॑येत्यप – अ॒नाय । विश्व॑म् ।
ज्योतिः॑ । यच्छ । अ॒ग्निः । ते । अधि॑पतिरित्यधि – पतिः ।
विश्व॑कर्मेति विश्व – कर्मा । त्वा । सा॒दय॑तु । अ॒न्तरि॑क्षस्य । पृ॒ष्ठे ।
ज्योति॑ष्मतीम् । विश्व॑स्मै । प्रा॒णाय॑ति प्र – अ॒नाय ।
अ॒पाना॑येत्यप – अ॒नाय । विश्व॑म् । ज्योतिः॑ । यच्छ । वा॒युः । ते ।
अधि॑पतिरित्यधि – पतिः । प्र॒जाप॑तिरिति प्र॒जा – पतिः । त्वा ।
सा॒दय॑तु । दि॒वः । पृ॒ष्ठे । ज्योति॑ष्मतीम् । विश्व॑स्मै । प्रा॒णाय॑ति
प्र – अ॒नाय । अ॒पाना॑येत्यप – अ॒नाय । विश्व॑म् । ज्योतिः॑ । यच्छ ।
परमे॒ष्टी । ते । अधि॑पतिरित्यधि – पतिः ।

पुरो॒वा॒त॒स॒नि॒रि॒ति॑ पुरो॒वा॒त॒ – स॒निः॑ । अ॒स्य॒ ।

अ॒भ्र॒स॒नि॒रि॒त्य॒भ्र॒ – स॒निः॑ । अ॒सि॒ ।

वि॒द्यु॒त्स॒नि॒रि॒ति॑ वि॒द्यु॒त् – स॒निः॑ । 20 (50)

TS 4.4.6.2

–र॒सि॑ स्त॒न॒यि॒न्नु॒स॒नि॒र॒सि॑ वृ॒ष्टि॑स॒नि॒र॒स्य॒ – ग्ने॒र्या॒न्य॒सि॑ दे॒वा॒ना॒म॒ग्ने॒
या॒न्य॒सि॑ वा॒यो॒र्या॒न्य॒सि॑ दे॒वा॒नां॑ वा॒यो॒या॒न्य॒स्य॒न्त॒रि॒क्ष॒स्य॒ या॒न्य॒सि॑
दे॒वा॒ना॒ – म॒न्त॒रि॒क्ष॒या॒न्य॒स्य॒ – न्त॒रि॒क्ष॒म॒स्य॒न्त॒रि॒क्षाय॑ त्वा स॒लि॒ला॒य॑ त्वा
स॒र्णी॒का॒य॑ त्वा स॒ती॒का॒य॑ त्वा के॒ता॒य॑ त्वा प्र॒चे॒त॒से॑ त्वा वि॒व॒स्व॒ते॑ त्वा
दि॒व॒स्त्वा॒ ज्यो॒ति॒ष॒ आ॒दि॒त्ये॒भ्य॒स्त्व॒र्चे॑ त्वा रु॒चे॑ त्वा द्यु॒ते॑ त्वा () भा॒से
त्वा ज्यो॒ति॒षे॑ त्वा य॒शो॒दां॑ त्वा य॒श॒सि॑ ते॒जो॒दां॑ त्वा ते॒ज॒सि॑ प॒यो॒दां॑ त्वा
प॒य॒सि॑ व॒र्चो॒दां॑ त्वा व॒र्च॒सि॑ द्र॒वि॒णो॒दां॑ त्वा द्र॒वि॒णे॑ सा॒द॒या॒मि॒
ते॒न॒र्षि॒णा॒ ते॒न॒ ब्र॒ह्म॒णा॒ तया॑ दे॒व॒त॒या॒ऽङ्गि॒र॒स्व॒द् ध्रु॒वा॒ सी॒द॑ ॥ 21

TS 4.4.6.2 - Padam

अ॒सि॒ । स्त॒न॒यि॒न्नु॒स॒नि॒रि॒ति॑ स्त॒न॒यि॒न्नु॒ – स॒निः॑ । अ॒सि॒ ।

वृ॒ष्टि॑स॒नि॒रि॒ति॑ वृ॒ष्टि॑ – स॒निः॑ । अ॒सि॒ । अ॒ग्नेः॑ । या॒नी॑ । अ॒सि॒ ।

दे॒वाना॑म् । अ॒ग्ने॒यानी॑त्य॒ग्ने॒-यानी॑ । अ॒सि॒ । वा॒योः । यानी॑ । अ॒सि॒ ।
 दे॒वाना॑म् । वा॒यो॒यानी॑ति वा॒यो – यानी॑ । अ॒सि॒ । अ॒न्तरि॑क्षस्य ।
 यानी॑ । अ॒सि॒ । दे॒वाना॑म् । अ॒न्तरि॑क्षयानीत्यन्तरि॑क्ष – यानी॑ । अ॒सि॒ ।
 अ॒न्तरि॑क्षम् । अ॒सि॒ । अ॒न्तरि॑क्षाय । त्वा । स॒लि॒लाय॑ । त्वा ।
 स॒र्णी॑काय । त्वा । स॒ती॑का॒येति॑ स – ती॒काय॑ । त्वा । के॒ताय॑ । त्वा ।
 प्र॒चे॒तस॑ इति प्र – चे॒त॒से । त्वा । वि॒व॒स्व॒ते । त्वा । दि॒वः । त्वा ।
 ज्यो॒ति॒षे । आ॒दि॒त्ये॒भ्यः । त्वा । ऋ॒चे । त्वा । रु॒चे । त्वा । द्यु॒ते ।
 त्वा () । भा॒से । त्वा । ज्यो॒ति॒षे । त्वा । य॒शो॒दा॒मिति॑ य॒शः-॒दाम् ।
 त्वा । य॒श॒सि । ते॒जो॒दा॒मिति॑ ते॒जः – दाम् । त्वा । ते॒ज॒सि ।
 प॒यो॒दा॒मिति॑ प॒यः – दाम् । त्वा । प॒य॒सि । वर्चो॑दा॒मिति॑ वर्चः-॒दाम् ।
 त्वा । वर्च॑सि । द्र॒वि॒णो॒दा॒मिति॑ द्र॒वि॒णः – दाम् । त्वा । द्र॒वि॒णे ।
 सा॒द॒या॒मि । ते॒न । ऋ॒षि॒णा । ते॒न । ब्र॒ह्म॒णा । तया॑ । दे॒व॒त॒या ।

अ॒ङ्गि॒र॒स्व॒त् । ध्रु॒वा । सी॒द ॥ 21 (79)

(वि॒द्यु॒त्स॒नि – द्यु॒ते त्वै – का॒न्न त्रि॒श॒च्च) (A6)

TS 4.4.7.1

भू॒य॒स्कृ॑द॒सि॒ वरि॑व॒स्कृ॑द॒सि॒ प्रा॒च्य॑स्यू॒र्ध्वा॑ऽस्य॒-न्तरि॑क्ष॒सद॑स्य॒-
न्तरि॑क्षे॒ सी॒दा-॒प्सु॑षद॒सि॒ श्ये॒नस॑द॒सि॒ गृ॒ध्र॑सद॒सि॒ सु॒पर्ण॑सद॒सि॒
ना॒क॒सद॑सि॒ पृ॒थि॒व्या॒स्त्वा॒ द्र॒वि॒णे॒ सा॒दया॑म्य॒-न्तरि॑क्षस्य॒ त्वा॒ द्र॒वि॒णे॒
सा॒दया॑मि॒ दि॒व॒स्त्वा॒ द्र॒वि॒णे॒ सा॒दया॑मि॒ दि॒शां॒ त्वा॒ द्र॒वि॒णे॒ सा॒दया॑मि॒
द्र॒वि॒णो॒दां॒ त्वा॒ द्र॒वि॒णे॒ सा॒दया॑मि॒ प्रा॒णं॒ मे॒ पा॒ह्य-॒पा॒नं॒ मे॒ पा॒हि॒
व्या॒नं॒ मे॒ - [] 22

TS 4.4.7.1 - Padam

भू॒य॒स्कृ॑द॒सि॒ भू॒यः॑ - कृ॒त् । अ॒सि॒ । वरि॑व॒स्कृ॑द॒सि॒ वरि॑वः - कृ॒त् ।
अ॒सि॒ । प्रा॒ची॑ । अ॒सि॒ । ऊ॒र्ध्वा॑ । अ॒सि॒ ।
अ॒न्तरि॑क्ष॒सद॑स्य॒न्तरि॑क्ष - सत् । अ॒सि॒ । अ॒न्तरि॑क्षे । सी॒द ।
अ॒प्सु॑षद॒सि॒ अ॒प्सु॑ - सत् । अ॒सि॒ । श्ये॒नस॑द॒सि॒ श्ये॒न-॑सत् । अ॒सि॒ ।
गृ॒ध्र॑सद॒सि॒ गृ॒ध्र-॑सत् । अ॒सि॒ । सु॒पर्ण॑सद॒सि॒ सु॒पर्ण॑ - सत् ।
अ॒सि॒ । ना॒क॒सद॑सि॒ ना॒क॒ - सत् । अ॒सि॒ । पृ॒थि॒व्याः॑ । त्वा॒ ।

द्र॒वि॒णे । सा॒द॒या॒मि । अ॒न्त॒रि॒क्ष॒स्य । त्वा । द्र॒वि॒णे । सा॒द॒या॒मि ।
दि॒वः । त्वा । द्र॒वि॒णे । सा॒द॒या॒मि । दि॒शाम् । त्वा । द्र॒वि॒णे ।
सा॒द॒या॒मि । द्र॒वि॒णो॒दा॒मि॒ति द्र॒वि॒णः – दा॒म् । त्वा । द्र॒वि॒णे ।
सा॒द॒या॒मि । प्रा॒णमि॒ति प्र – अ॒नम् । मे । पा॒हि ।
आ॒पा॒नमि॒त्यप – अ॒नम् । मे । पा॒हि । व्या॒नमि॒ति वि – अ॒नम् ।

मे । 22 (50)

TS 4.4.7.2

पा॒ह्या॒यु॒र्मे पा॒हि वि॒श्वा॒यु॒र्मे पा॒हि स॒र्वा॒यु॒र्मे पा॒ह्य॒ग्ने यत् ते पर॑
ह॒न्ना॒म ता॒वेहि स॑ र॒भाव॒है पा॒ञ्च ज॒न्ये॒ष्व-प्ये॒द्ध्य॒ग्ने या॒वा
अ॒या॒वा ए॒वा ऊ॒माः स॒ब्दः स॒गरः सु॒मे॒कः ॥ 23

TS 4.4.7.2 - Padam

पा॒हि । आ॒युः । मे । पा॒हि । वि॒श्वा॒यु॒रि॒ति वि॒श्व-आ॒युः । मे । पा॒हि ।
स॒र्वा॒यु॒रि॒ति स॒र्व – आ॒युः । मे । पा॒हि । अ॒ग्ने । यत् ।
ते । पर॑म् । ह॒त् । ना॒म । तौ । ए॒ति । इ॒हि । स॒मि॒ति । र॒भाव॒है ।
पा॒ञ्चज॒न्ये॒ष्वि॒ति पा॒ञ्च – ज॒न्ये॒षु । अ॒पी॒ति । ए॒धि । अ॒ग्ने ।

या॒वाः । अया॒वाः । ए॒वाः । ऊ॒माः । स॒ब्दः । स॒गरः ।

सु॒मे॒क इति सु – मे॒कः ॥ 23 (32) (व्या॒नं मे॒-द्वा॒त्रिं॒शच्च) (A7)

TS 4.4.8.1

अ॒ग्नि॒ना वि॒श्वा॒षाट् सूर्ये॑ण स्व॒राट् कृ॒त्वा श॒ची॒पति॑र् ऋ॒षभे॑ण त्व॒ष्टा
य॒ज्ञेन॑ म॒घवा॑न् दक्षि॒णया॑ सु॒वर्गो॑ म॒न्युना॑ वृ॒त्रहा॑ सौहा॒र्धेन॑ तनू॒धा
अ॒न्नेन॑ ग॒यः पृ॒थि॒व्याऽस॒नो दृ॒ग्भिर॑न्नादो व॒षट्का॑रेणर्द्धः सा॒म्ना तनू॑पा
वि॒राजा॑ ज्योति॒ष्मान् ब्र॒ह्मणा॑ सोम॒पा गो॒भिर्य॑ज्ञं दा॒धार क्ष॒त्रेण॑
म॒नुष्या॑-नश्चे॒न च र॒थेन॑ च व॒ज्र्य॑तुभिः प्र॒भुः सँव॑त्सरेण परि॒भू
स्तप॑साऽनाधृष्टः सूर्यः सन् तनू॒भिः ॥ 24

TS 4.4.8.1 - Padam

अ॒ग्नि॒ना । वि॒श्वा॒षाट् । सूर्ये॑ण । स्व॒राडि॑ति स्व – राट् । कृ॒त्वा ।
श॒ची॒पतिः॑ । ऋ॒षभे॑ण । त्व॒ष्टा । य॒ज्ञेन॑ । म॒घवा॑निति म॒घ-वा॑न् ।
दक्षि॒णया॑ । सु॒वर्ग इति॑ सुवः – गः । म॒न्युना॑ । वृ॒त्रहे॑ति वृ॒त्र – हा ।
सौहा॒र्धेन॑ । तनू॒धा इति॑ तनू – धाः । अ॒न्नेन॑ । ग॒यः । पृ॒थि॒व्या ।
अ॒स॒नोत् । ऋ॒ग्भिरि॑त्यृक् – भिः । अ॒न्नाद॑ इत्यन्न – अदः ।

व॒षट्॑का॒रेणे॑ति॒ व॒षट् – का॒रेण॑ । ऋ॒द्धः । सा॒म्ना॑ ॥ त॒नू॒पा इति॑
त॒नू – पाः । वि॒राजे॑ति॒ वि – रा॒जा ॥ ज्योति॑ष्मान् । ब्र॒ह्मणा॑ ।
सोम॑पा इति॒ सोम – पाः । गो॒भिः । य॒ज्ञम् । दा॒धार । क्ष॒त्रेण॑ ।
म॒नु॒ष्यान् । अ॒श्वेन॑ । च । रथे॑न । च । व॒ज्री । ऋ॒तुभि॑रित्यु॒तु – भिः ।
प्र॒भुरि॑ति॒ प्र – भुः । सँव॑त्सरेणेति॒ सं – व॒त्सरे॑ण । प॒रिभू॑रिति॒
प॒रि – भूः । तप॑सा । अ॒नाधृ॑ष्ट इत्य॒ना – धृ॑ष्टः । सूर्यः॑ । स॒न् ।
त॒नूभिः॑ ॥ 24 (49) (अ॒ग्नि – रै॒कान्न॑ प॒ञ्चा॒शत्) (A8)

TS 4.4.9.1

प्र॒जाप॑तिर्म॒नसा॑ ऽन्धोऽच्छे॑तो॒ धा॒ता दी॒क्षाया॑ ॐ स॒विता॑ भृ॒त्यां पू॒षा
सोम॑क्रय॒ण्यां व॑रु॒ण उप॑न॒द्धो ऽसु॑रः क्री॒यमा॑णो मि॒त्रः क्री॒तः
शि॒पिवि॑ष्ट आ॒सादि॑तो न॒रंधि॑षः प्रो॒ह्यमा॑णो ऽधि॑पतिरा॒गतः॑ प्र॒जाप॑तिः
प्र॒णीय॑मानो ऽग्नि॒राग्नी॑द्धे बृ॒हस्प॑तिरा॒ग्नीद्धा॑त् प्र॒णीय॑मान॒ इन्द्रो॑
ह॒विर्धा॑ने ऽदि॒तिरा॑सादि॒तो वि॑ष्णु॒रुपा॑व॒ह्मि॒यमा॑णो ऽथ॒र्वोपो॑त्तो
य॒मोऽभि॑षु॒तो ऽपू॑त॒पा आ॑धू॒यमा॑नो वा॒युः पू॒यमा॑नो मि॒त्रः क्षी॑र॒श्रीर्म॑न्थी
स॒क्तु॒श्रीर्वै॑श्व॒देव॑ उ॒न्नीतो॑ रु॒द्र () आ॑हु॒तो वा॒युरा॑वृ॒त्तो नृ॑च॒क्षाः

प्रति॑ख्यातो भ॒क्ष आ॒गतः॑ पि॒तृणां॑ ना॒रा॒श॒सो ऽसु॒रा॒न्तः॑ सि॒न्धु॒र-
वभृ॑थमवप्रयन्थ् स॒मु॒द्रो ऽव॒गतः॑ स॒लि॒लः प्र॒प्लु॒तः
सु॒व॒रु॒दृ॒चं ग॒तः॑ ॥ 25

TS 4.4.9.1 - Padam

प्र॒जाप॑तिरिति प्र॒जा - प॒तिः । म॒न॒सा । अ॒न्धः । अ॒च्छे॑त
इ॒त्य॒च्छ - इ॒तः । धा॒ता । दी॒क्षा॒याम् । स॒वि॒ता । भृ॒त्याम् । पू॒षा ।
सोम॑क्रय॒ण्यामि॑ति सोम - क्रय॒ण्याम् । व॒रु॒णः । उ॒प॒न॒द्ध
इ॒त्यु॒प - न॒द्धः । अ॒सु॒रः । क्री॒य॒मा॒णः । मि॒त्रः । क्री॒तः ।
शि॒पि॒वि॒ष्ट इति॑ शि॒पि - वि॒ष्टः । आ॒सा॒दि॒त इ॒त्या - सा॒दि॒तः ।
न॒रं॒धि॒षः । प्रो॒ह्य॒मा॒ण इति॑ प्र - उ॒ह्य॒मा॒णः । अ॒धि॒प॒ति॒रि॒त्य॒धि - प॒तिः ।
आ॒ग॒त इ॒त्या - ग॒तः । प्र॒जाप॑तिरिति प्र॒जा - प॒तिः । प्र॒णी॒य॒मा॒न
इति॑ प्र - नी॒य॒मा॒नः । अ॒ग्निः । आ॒ग्नी॒द्ध्र इ॒त्याग्नि॑ - इ॒द्ध्रे ।
बृ॒ह॒स्प॒तिः । आ॒ग्नी॒द्धा॒दि॒त्याग्नि॑ - इ॒द्ध्रा॒त् । प्र॒णी॒य॒मा॒न इति॑
प्र - नी॒य॒मा॒नः । इ॒न्द्रः । ह॒वि॒द्धानि॑ इति॑ ह॒विः - धा॒नै ।

अ॒दि॒तिः । आ॒सा॒दि॒त इ॒त्या – सा॒दि॒तः । वि॒ष्णुः ।
उ॒पा॒व॒ह्रि॒यमा॒ण इ॒त्यु॒प – अ॒व॒ह्रि॒यमा॒णः । अथ॑र्वा । उ॒पो॒त्त॑
इ॒त्यु॒प – उ॒त्तः । य॒मः । अ॒भि॒षु॒त इ॒त्यभि॑ – सु॒तः । अ॒पू॒तपा॑
इ॒त्यपू॑त – पाः । आ॒धू॒यमा॒न इ॒त्या – धू॒यमा॒नः । वा॒युः । पू॒यमा॒नः ।
मि॒त्रः । क्षी॒रश्री॑रिति क्षी॒र-श्रीः । म॒न्थी । स॒क्तु॒श्री॑रिति स॒क्तु – श्रीः ।
वै॒श्व॒दे॒व इति॑ वै॒श्व – दे॒वः । उ॒न्नी॒त इ॒त्युत् – नी॒तः । रु॒द्रः () ।
आ॒हु॒त इ॒त्या – हु॒तः । वा॒युः । आ॒वृ॒त्त इ॒त्या – वृ॒त्तः । नृ॒च॒क्षा इति॑
नृ – च॒क्षाः । प्र॒ति॒ख्या॒त इति॑ प्र॒ति – ख्या॒तः । भ॒क्षः । आ॒गत॑
इ॒त्या – ग॒तः । पि॒तृ॒णाम् । ना॒रा॒श॒स्सः । अ॒सुः । आ॒त्तः । सि॒न्धुः ।
अ॒व॒भृ॒थमि॒त्यव॑ – भृ॒थम् । अ॒व॒प्र॒यन्नि॒त्यव॑ – प्र॒यन् । स॒मु॒द्रः ।
अ॒व॒गत॑ इ॒त्यव॑ – ग॒तः । स॒लि॒लः । प्र॒प्लु॒त इति॑ प्र – प्लु॒तः ।
सु॒वः । उ॒दृ॒चमि॒त्युत् – ऋ॒चम् । ग॒तः ॥ 25 (71)

(रु॒द्र – ए॒कविं॑शतिश्च) (A9)

TS 4.4.10.1

कृ॒त्तिका॑ नक्ष॒त्र-म॒ग्निर्दे॒वता॑ऽग्ने रुचः॑ स्थ प्र॒जाप॑तेर्धा॒तुः
सोम॑स्यर्चे॒ त्वा रु॒चे त्वा द्यु॒ते त्वा भा॒से त्वा ज्योति॑षे त्वा रोहि॒णी
नक्ष॑त्रं प्र॒जाप॑तिर्दे॒वता॑ मृ॒गशी॒र्षं नक्ष॑त्रं॒ सोमो॑ दे॒वता॑ ऽ॒र्द्रा नक्ष॑त्रं॒
रुद्रो॑ दे॒वता॑ पु॒नर्व॑सू नक्ष॑त्रमदि॒तिर्दे॒वता॑- ति॒ष्यो नक्ष॑त्रं बृ॒हस्प॑तिर्दे॒वता॑
ऽ॒श्रेषा॑ नक्ष॑त्रं॒ सर्पा॑ दे॒वता॑ म॒घा नक्ष॑त्रं पि॒तरो॑ दे॒वता॑ फल्गु॑नी
नक्ष॑त्र - [] 26

TS 4.4.10.1 - Padam

कृ॒त्तिकाः॑ । नक्ष॒त्रम् । अ॒ग्निः । दे॒वता॑ । अ॒ग्नेः । रुचः॑ । स्थ ।
प्र॒जाप॑तेरि॒ति प्र॒जा - प॒तेः । धा॒तुः । सोम॑स्य । ऋ॒चे । त्वा । रु॒चे ।
त्वा । द्यु॒ते । त्वा । भा॒से । त्वा । ज्योति॑षे । त्वा । रोहि॒णी ।
नक्ष॑त्रम् । प्र॒जाप॑तिरि॒ति प्र॒जा - प॒तिः । दे॒वता॑ । मृ॒गशी॒र्षमि॑ति
मृ॒ग - शी॒र्षम् । नक्ष॑त्रम् । सोमः॑ । दे॒वता॑ । आ॒र्द्रा । नक्ष॑त्रम् ।
रुद्रः॑ । दे॒वता॑ । पु॒नर्व॑सू इति पु॒नः - व॒सू । नक्ष॑त्रम् । अदि॒तिः ।
दे॒वता॑ । ति॒ष्यः । नक्ष॑त्रम् । बृ॒हस्प॑तिः । दे॒वता॑ ।

आ॒श्रे॒षा इ॒त्या-श्रे॒षाः । नक्ष॑त्रम् । सर्पाः॑ । दे॒वता॑ । म॒घाः । नक्ष॑त्रम् ।
पि॒तरः॑ । दे॒वता॑ । फल्गु॑नी इति । नक्ष॑त्रम् । 26 (50)

TS 4.4.10.2

-म॒र्य॒मा दे॒वता॑ फल्गु॑नी नक्ष॑त्रं भ॒गो दे॒वता॑ ह॒स्तो नक्ष॑त्रं स॒विता
दे॒वता॑ चि॒त्रा नक्ष॑त्रमिन्द्रो दे॒वता॑ स्वा॒ती नक्ष॑त्रं वा॒युर्दे॒वता॑ वि॒शाखे॑
नक्ष॑त्रमिन्द्रा॒ग्नी दे॒वता॑ ऽनू॒राधा॑ नक्ष॑त्रं मि॒त्रो दे॒वता॑ रोहि॒णी
नक्ष॑त्रमिन्द्रो दे॒वता॑ वि॒चृ॒तौ नक्ष॑त्रं पि॒तरो दे॒वता॑ ऽषा॒ढा नक्ष॑त्रमापो
दे॒वता॑ ऽषा॒ढा नक्ष॑त्रं वि॒श्वे दे॒वा दे॒वता॑ श्रो॒णा नक्ष॑त्रं वि॒ष्णुर्दे॒वता॑
श्र॒वि॒ष्ठा नक्ष॑त्रं व॒सवो॑ - [] 27

TS 4.4.10.2 - Padam

अ॒र्य॒मा । दे॒वता॑ । फल्गु॑नी इति । नक्ष॑त्रम् । भ॒गः । दे॒वता॑ । ह॒स्तः ।
नक्ष॑त्रम् । स॒विता । दे॒वता॑ । चि॒त्रा । नक्ष॑त्रम् । इन्द्रः॑ । दे॒वता॑ ।
स्वा॒ती । नक्ष॑त्रम् । वा॒युः । दे॒वता॑ । वि॒शाखे॑ इति वि - शा॒खे ।
नक्ष॑त्रम् । इन्द्रा॒ग्नी इतीन्द्र॑ - अ॒ग्नी । दे॒वता॑ । अ॒नू॒राधा॑
इत्यनु॑ - रा॒धाः । नक्ष॑त्रम् । मि॒त्रः । दे॒वता॑ । रोहि॒णी । नक्ष॑त्रम् ।

इन्द्रः । देवता । विचृताविति वि – चृतौ । नक्षत्रम् । पितरः ।
देवता । अषाढाः । नक्षत्रम् । आपः । देवता । अषाढाः । नक्षत्रम् ।
विश्वे । देवाः । देवता । श्रोणा । नक्षत्रम् । विष्णुः । देवता ।
श्रविष्ठाः । नक्षत्रम् । वसवः । 27 (50)

TS 4.4.10.3

देवता शतभिषङ् नक्षत्रमिन्द्रो देवता प्रोष्ठपदा नक्षत्रमज एकपाद्
देवता प्रोष्ठपदा नक्षत्रमहिर्बुद्धिनयो देवता रेवती नक्षत्रं पूषा देवता
ऽश्वयुजौ नक्षत्रमश्विनौ देवता ऽपभरणीर्नक्षत्रं यमो देवता,
पूर्णा पश्चाद् यत् ते देवा अदधुः ॥ 28

TS 4.4.10.3 - Padam

देवता । शतभिषगिति शत – भिषक् । नक्षत्रम् । इन्द्रः । देवता ।
प्रोष्ठपदा इति प्रोष्ठ – पदाः । नक्षत्रम् । अजः ।
एकपादित्येक – पात् । देवता । प्रोष्ठपदा इति प्रोष्ठ – पदाः ।
नक्षत्रम् । अहिः । बुद्धिनयः । देवता । रेवती । नक्षत्रम् । पूषा ।
देवता । अश्वयुजावित्यश्व – युजौ । नक्षत्रम् । अश्विनौ । देवता ।

अ॒प॒भ॒र॒णी॒रि॒त्य॒प – भ॒र॒णीः । न॒क्ष॒त्र॒म् । य॒मः । दे॒वता॑ । पू॒र्णा ।

प॒श्चात् । यत् । ते । दे॒वाः । अ॒द॒धुः ॥ 28 (33)

(फ॒ल्गु॒नी न॒क्ष॒त्रं – वै॒स॒व – स्त्र॒य॒स्त्रि॒ंश॒च्च) (A10)

TS 4.4.11.1

म॒धुश्च॑ मा॒ध॒वश्च॑ वा॒स॒न्ति॒का॒वृ॒तू शु॒क्रश्च॑ शु॒चिश्च॑ ग्रै॒ष्मा॒वृ॒तू
न॒भश्च॑ न॒भ॒स्य॑श्च॒ वा॒र्षि॒का॒वृ॒तू इ॒षश्चो॒र्जश्च॑ शा॒र॒दा॒वृ॒तू
स॒हश्च॑ स॒ह॒स्य॑श्च॒ है॒म॒न्ति॒का॒वृ॒तू त॒पश्च॑ त॒प॒स्य॑श्च॒ शै॒शि॒रा॒वृ॒तू
अ॒ग्ने॒र॒न्तः श॒ले॒षो॒ऽसि॒ क॒ल्पे॒तां द्या॒वापृ॑थि॒वी क॒ल्प॑न्ता॒माप॒ ओष॑धीः
क॒ल्प॑न्ता॒म॒ग्न॒यः पृ॒थ॒ङ्म॒म ज्यै॑ष्ठ्याय॒ स॒व॒र॒ता – [] 29

TS 4.4.11.1 - Padam

म॒धुः । च॒ । मा॒ध॒वः । च॒ । वा॒स॒न्ति॒कौ । ऋ॒तू इति॑ । शु॒क्रः । च॒ ।
शु॒चिः । च॒ । ग्रै॒ष्मौ । ऋ॒तू इति॑ । न॒भः । च॒ । न॒भ॒स्यः । च॒ ।
वा॒र्षि॒कौ । ऋ॒तू इति॑ । इ॒षः । च॒ । ऊ॒र्जः । च॒ । शा॒र॒दौ । ऋ॒तू इति॑ ।
स॒हः । च॒ । स॒ह॒स्यः । च॒ । है॒म॒न्ति॒कौ । ऋ॒तू इति॑ । त॒पः । च॒ ।
त॒प॒स्यः । च॒ । शै॒शि॒रौ । ऋ॒तू इति॑ । अ॒ग्नेः ।

अ॒न्तः॒श्ले॒ष इ॒त्यन्तः॑ – श्ले॒षः । अ॒सि॒ । क॒ल्पे॒ताम् । द्या॒वापृ॑थि॒वी
इति॑ द्या॒वा – पृ॒थि॒वी । क॒ल्पन्ता॑म् । आ॒पः । ओष॑धीः । क॒ल्पन्ता॑म् ।
अ॒ग्नयः॑ । पृ॒थक् । म॒म । ज्यैष्ठ्या॑य ।

स॒व्र॒ता इति॑ स॒-व्र॒ताः । 29 (50)

TS 4.4.11.2

ये॒ऽग्नयः॑ स॒मन॑सोऽन्तरा॑ द्या॒वापृ॑थि॒वी शै॒शिरा॑वृ॒तू अ॒भि क॒ल्पमा॑ना
इन्द्र॑मिव दे॒वा अ॒भि सँ॑वि॒शन्तु॑ सँ॒यच्च॑ प्र॒चेता॑श्चा॒ग्नेः सोम॑स्य
सूर्य॑स्यो॒-ग्रा च॑ भी॒मा च॑ पि॒तृणां॑ य॒मस्येन्द्र॑स्य ध्रु॒वा च॑ पृ॒थि॒वी च॑
दे॒वस्य॑ स॒वि॒तुर्म॑रुतां व॒रुण॑स्य ध॒र्त्री च॑ ध॒रि॒त्री च॑ मि॒त्राव॑रुणयो
मि॒त्रस्य॑ धा॒तुः प्रा॒ची च॑ प्र॒तीची॑ च॒ वसू॑नां रु॒द्राणा॑ – [] 30

TS 4.4.11.2 - Padam

ये । अ॒ग्नयः॑ । स॒मन॑स इति॑ स – म॒नसः॑ । अ॒न्तरा॑ । द्या॒वापृ॑थि॒वी
इति॑ द्या॒वा – पृ॒थि॒वी । शै॒शिरौ॑ । ऋ॒तू इति॑ । अ॒भीति॑ । क॒ल्पमा॑नाः ।
इन्द्र॑म् । इ॒व । दे॒वाः । अ॒भि । स॒मिति॑ । वि॒शन्तु॑ । सँ॒यदि॑ति
सं – यत् । च॒ । प्र॒चेता॑ इति॑ प्र – चे॒ताः । च॒ । अ॒ग्नेः ।

सोम॑स्य । सूर्य॑स्य । उ॒ग्रा । च॒ । भी॒मा । च॒ । पि॒त॒ृणा॑म् । य॒मस्य॑ ।
इन्द्र॑स्य । ध्रु॒वा । च॒ । पृ॒थि॒वी । च॒ । दे॒वस्य॑ । स॒वि॒तुः ।
म॒रु॒ताम् ॥ व॒रु॒णस्य॑ । ध॒र्त्री । च॒ । ध॒रि॒त्री । च॒ ।
मि॒त्राव॑रुणयो॒रिति॑ मि॒त्रा – व॒रु॒णयोः॑ । मि॒त्रस्य॑ । धा॒तुः । प्रा॒ची ॥
च॒ । प्र॒ती॒ची ॥ च॒ । व॒सू॒नाम् । रु॒द्राणां॑ ॥ 30 (50)

TS 4.4.11.3

—मादित्यानां ते तेऽधिपतयस्तेभ्यो नमस्ते नो मृडयन्तु ते यं द्विष्मो
यश्च नो द्वेष्टि तं वो जंभे दधामि सहस्रस्य प्रमा असि सहस्रस्य
प्रतिमा असि सहस्रस्य विमा असि सहस्रस्योन्मा असि साहस्रोऽसि
सहस्राय त्वेमा मे अग्न इष्टका धेनवः सन्त्वेका च शतं च सहस्रं
चायुतं च — [] 31

TS 4.4.11.3 - Padam

आ॒दि॒त्याना॑म् । ते । ते । अधि॑पतय॒ इत्यधि॑-पतयः । तेभ्यः । नमः ।
ते । नः । मृ॒डय॑न्तु । ते । यम् । द्वि॒ष्मः । यः । च । नः । द्वेष्टि॑ ।
तम् । वः । ज॑म्भे । दधा॑मि । स॒हस्र॑स्य । प्रमे॑ति प्र - मा । अ॒सि ।

स॒हस्र॑स्य । प्र॒ति॒मे॒ति॑ प्र॒ति – मा । अ॒सि॒ । स॒हस्र॑स्य ।
वि॒मे॒ति॑ वि – मा । अ॒सि॒ । स॒हस्र॑स्य । उ॒न्मे॑त्युत् – मा । अ॒सि॒ ।
सा॒हस्रः॑ । अ॒सि॒ । स॒हस्रा॑य । त्वा । इ॒माः । मे । अ॒ग्ने॒ । इ॒ष्टकाः॑ ।
धे॒नवः॑ । स॒न्तु॒ ॥ ए॒का॒ । च॒ । श॒तम् । च॒ । स॒हस्र॑म् । च॒ ।
अ॒युत॑म् । च॒ । 31 (50)

TS 4.4.11.4

नि॒युतं॑ च प्र॒युतं॑ चा॒र्बुदं॑ च न्य॒र्बुदं॑ च स॒मुद्र॑श्च म॒द्ध्यं॑ चा॒न्तश्च॑
परा॑र्धश्चे॒मा मे॑ अ॒ग्न इ॒ष्टका॑ धे॒नवः॑ स॒न्तु ष॒ष्टिः स॒हस्र॑म॒युत॑-
मक्षी॑यमाणा ऋ॒तस्था॑ स्थ॒र्ताव॑धो घृ॒तश्रु॑तो म॒धुश्रु॑त ऊ॒र्जस्व॑तीः
स्व॒धावि॑नी॒स्ता मे॑ अ॒ग्न इ॒ष्टका॑ धे॒नवः॑ स॒न्तु वि॒राजो॑ नाम
का॒मदु॑घा अ॒मुत्रा॑मु॒ष्मिन् लो॑के ॥ 32

TS 4.4.11.4 - Padam

नि॒युत॑मि॒ति॒ नि – यु॒तम् । च॒ । प्र॒युत॑मि॒ति॒ प्र-यु॒तम् । च॒ । अ॒र्बुद॑म् ।
च॒ । न्य॒र्बुद॑मि॒ति॒ नि – अ॒र्बुद॑म् । च॒ । स॒मुद्रः॑ । च॒ । म॒द्ध्यम् । च॒ ।
अ॒न्तः । च॒ । पा॒रा॒र्ध इति॑ पर – अ॒र्धः । च॒ । इ॒माः । मे॒ । अ॒ग्ने॒ ।

इ॒ष्ट॒काः । धे॒न॒वः । स॒न्तु । ष॒ष्टिः । स॒ह॒स्र॑म् । अ॒यु॒त॑म् ।
अक्षी॑यमाणाः । ऋ॒त॒स्था इत्यृ॑त – स्थाः । स्थ ।
ऋ॒ता॒वृ॒ध इत्यृ॑त – वृ॒धः । घृ॒त॒श्रु॒त इति॑ घृ॒त – श्रु॒तः ।
मधु॑श्रु॒त इति॑ मधु – श्रु॒तः । ऊ॒र्ज॑स्वतीः । स्व॒धा॒विनी॑रिति॑
स्व॒धा – विनीः॑ । ताः । मे । अ॒ग्ने । इ॒ष्ट॒काः । धे॒न॒वः । स॒न्तु ।
वि॒राज॑ इति॑ वि – राजः । ना॒म । का॒म॒दु॒घा इति॑ का॒म – दु॒घाः ।
अ॒मु॒त्र । अ॒मु॒ष्मिन् । लो॒के ॥ 32 (45)

(स॒व॒ता – रु॒द्राणा॑ – म॒यु॒तञ्च॑ – पञ्च॑चत्वारि॒ंश॑च्च) (A11)

TS 4.4.12.1

स॒मिद्-दि॒शा॒मा॒शया॑ नः सु॒व॒र्वि॒न्म॒धो॒रतो॑ मा॒ध॒वः पा॒त्व॒स्मा॒न् ।
अ॒ग्नि॒र्दे॒वो दु॒ष्ट॒री॒तु॒रदा॑भ्य इ॒दं क्ष॒त्रं र॑क्षतु पा॒त्व॒स्मा॒न् ॥
रथ॑न्त॒रं सा॒म॒भिः पा॒त्व॒स्मा॒न् गा॒य॒त्री छ॒न्द॒सां वि॒श्व॒रू॒पा ।
त्रि॒वृ॒न्नो वि॒ष्टया॑ स्तो॒मो अ॒ह्नां स॒मु॒द्रो वा॒त इ॒द॒मो॒जः पि॒प॒र्तु ॥
उ॒ग्रा दि॒शा॒म॒भि-भू॑तिर्वयो॒धाः शु॒चिः शु॒क्रे अ॒ह॒न्यो॒ज॒सीना॑ ।
इ॒न्द्रा॒धि॒पतिः॑ पि॒पृ॒ता॒दतो॑ नो म॒हि – [] 33

TS 4.4.12.1 - Padam

स॒मिदि॑ति॒ सम् – इत् । दि॒शाम् । आ॒शया॑ ॥ नः । सु॒वर्वि॑दि॒ति
सु॒वः – वि॒त् । म॒धोः ॥ अ॒तः । मा॒धवः । पा॒तु । अ॒स्मान् ॥ अ॒ग्निः ।
दे॒वः । दु॒ष्टरी॑तुः । अ॒दाभ्यः ॥ इ॒दम् । क्ष॒त्रम् । र॒क्षतु॑ । पा॒तु ।
अ॒स्मान् ॥ र॒थन्त॑रमि॒ति रथं – त॒रम् । सा॒मभि॑रि॒ति सा॒म – भिः ।
पा॒तु । अ॒स्मान् । गा॒यत्री । छ॒न्दसा॑म् । वि॒श्वरू॑पेति॒ विश्व – रू॒पा ॥
त्रि॒वृदि॑ति॒ त्रि-वृ॑त् । नः । वि॒ष्टये॑ति॒ वि – स्थ॑या ॥ स्तो॒मः । अ॒हाम् ।
स॒मु॒द्रः । वा॒तः । इ॒दम् । ओ॒जः । पि॒प॒र्तु ॥ उ॒ग्रा । दि॒शाम् ।
अ॒भिभू॑तिरि॒त्यभि – भू॒तिः । व॒यो॒धा इति॑ व॒यः- धाः । शु॒चिः ।
शु॒क्रे । अ॒हनि॑ । ओ॒ज॒सीना॑ ॥ इ॒न्द्र । अ॒धिप॑तिरि॒त्यधि – प॒तिः ।
पि॒प॒तात् । अ॒तः । नः । म॒हि । 33 (50)

TS 4.4.12.2

क्ष॒त्रं वि॒श्वतो॑ धा॒रये॑दं ॥
बृ॒हत् सा॒म क्ष॒त्रभृ॑द्-वृ॒द्ध वृ॑ष्णि॒यं त्रि॒ष्टुभौ॑जः शु॒भित॑ मु॒ग्रवी॑रं ।
इ॒न्द्र स्तो॒मेन॑ पञ्च॒दशे॑न॒ मद्ध्य॑मि॒दं वा॑ते॒न स॑गरेण रक्ष ॥

प्राची॑ दि॒शाꣳ स॒हय॑शा य॒शस्व॑ती वि॒श्वे दे॒वाः प्रा॒वृषा ऽह्नाꣳ
सुव॑र्वती ।

इ॒दं क्ष॒त्रं दु॒ष्टर॑म॒स्त्वो॒जो ऽना॑धृष्टꣳ स॒हस्रि॑यꣳ स॒हस्व॑त् ॥
वैरू॒पे सा॒मन्नि॒ह तच्छ॑के॒म जग॑त्यैनं वि॒क्ष्वा वैश॑यामः ।

वि॒श्वे दे॒वाः सप्त॑द॒शेन॑ – [] 34

TS 4.4.12.2 - Padam

क्ष॒त्रम् । वि॒श्वतः॑ । धा॒रय॑ । इ॒दम् ॥ बृ॒हत् । सा॒म । क्ष॒त्रभृ॑दिति
क्ष॒त्र – भृ॑त् । वृ॒द्धवृ॑ष्णि॒यमि॑ति वृ॒द्ध-वृ॑ष्णि॒यम् । त्रि॒ष्टुभा॑ । ओजः॑ ।
शु॒भित॑म् । उ॒ग्रवी॑र॒मित्यु॒ग्र – वी॒रम् ॥ इन्द्र॑ । स्तो॒मेन॑ । पञ्च॑द॒शेने॑ति
पञ्च॑ – द॒शेन॑ । मद्ध्य॑म् । इ॒दम् । वा॒तेन॑ । स॒गरे॑ण । र॒क्ष ॥ प्राची॑ ।
दि॒शाम् । स॒हय॑शा इति स॒ह – य॒शाः । य॒शस्व॑ती । वि॒श्वे । दे॒वाः ।
प्रा॒वृषा॑ । अ॒ह्नाम् । सुव॑र्वतीति सुवः – व॒ती ॥ इ॒दम् । क्ष॒त्रम् ।
दु॒ष्टर॑म् । अ॒स्तु । ओजः॑ । अ॒नाधृ॑ष्ट॒मित्य॑ना – धृ॒ष्टम् । स॒हस्रि॑यम् ।
स॒हस्व॑त् ॥ वैरू॒पे । सा॒मन् । इ॒ह । तत् । श॒के॒म । जग॑त्या । ए॒नम् ।

वि॒क्षु । ए॒ति । वे॒श॒या॒मः ॥ वि॒श्वे॑ । दे॒वाः ।

स॒प्त॒द॒शे॒ने॒ति॑ स॒प्त – द॒शे॒न । 34 (50)

TS 4.4.12.3

व॒र्च इ॒दं क्ष॒त्रꣳ स॒लि॒ल॒वा॒त॒मु॒ग्रं ॥

ध॒र्त्री दि॒शां क्ष॒त्रमि॒दं दा॒धारो॒प॒स्थाऽऽशा॑नां मि॒त्रव॑द॒स्त्वो॒जः ।

मि॒त्रा॒व॒रु॒णा श॒रदाऽऽह्नां॑ चि॒किलू॑ अ॒स्मै रा॒ष्ट्राय॑ म॒हि श॒र्म य॑च्छ॒तं ॥

वैरा॒जे सा॒म॒न्न॒धि मे म॒नी॒षाऽनु॑ष्टु॒भा संभृ॑तं वी॒र्यꣳ स॒हः ।

इ॒दं क्ष॒त्रं मि॒त्रव॑दा॒र्द्रदा॑नु मि॒त्रा॒व॒रु॒णा र॒क्षत॑-मा॒धि॒प॒त्यैः ॥

स॒म्रा॒ट् दि॒शाꣳ स॒ह॒सा॒म्नी स॒ह॒स्व॒त्यृ॒तुर्हे॒म॒न्तो वि॒ष्टया॑ नः पि॒प॒र्तु ।

अ॒व॒स्यु॒वा॒ता – [] 35

TS 4.4.12.3 - Padam

व॒र्चः । इ॒दम् । क्ष॒त्रम् । स॒लि॒ल॒वा॒त॒मि॒ति॑ स॒लि॒ल – वा॒तम् । उ॒ग्रम् ॥

ध॒र्त्री । दि॒शाम् । क्ष॒त्रम् । इ॒दम् । दा॒धार । उ॒प॒स्थे॒त्यु॒प – स्था ।

आ॒शा॒नाम् । मि॒त्रव॑दि॒ति मि॒त्र – व॒त् । अ॒स्तु । ओ॒जः ॥ मि॒त्रा॒व॒रु॒णे॒ति॑

मि॒त्रा – व॒रु॒णा । श॒रदा॑ । अ॒ह्नाम् । चि॒किलू॑ इति । अ॒स्मै । रा॒ष्ट्राय॑ ।

महि॑ । शर्म॑ । य॒च्छ॒तम् ॥ वैरा॒जे । साम॑न् ।
 अधी॑ति । मे॒ । मनी॒षा । अनु॑ष्टुभेत्यनु॑ – स्तु॒भा ॥
 संभृ॑तमि॒ति सं – भृ॒तम् । वी॒र्यम् । सहः॑ ॥ इ॒दम् । क्ष॒त्रम् ।
 मि॒त्रव॑दि॒ति मि॒त्र – व॒त् । आ॒र्द्रदा॑न्वित्या॒र्द्र – दा॒नु ।
 मि॒त्राव॑रुणेति॒ मि॒त्रा – व॒रुणा॑ । रक्ष॑तम् । आधि॑पत्यैरित्याधि॑-प॒त्यैः ॥
 स॒म्राडि॑ति॒ सम् – राट् । दि॒शाम् । स॒हसा॑म्नीति॒ सह – सा॒म्नी ।
 सह॑स्वती । ऋ॒तुः । हे॒मन्तः । वि॒ष्टये॑ति वि – स्थ॒या ॥ नः॑ । पि॒प॒र्तु ॥
 अ॒वस्यु॑वा॒ता इ॒त्यव॑स्यु – वा॒ताः । 35 (50)

TS 4.4.12.4

बृ॒हती॑र्नु श॒क्वरी॑रि॒मं य॒ज्ञम॑वन्तु नो घृ॒ताचीः॑ ॥
 सु॒वर्व॑ती सु॒दु॒घा नः॑ प॒यस्व॑ती दि॒शां दे॒व्यव॑तु नो घृ॒ताचीः॑ ॥
 त्वं गो॒पाः पु॒रए॒तोत॑ प॒श्चाद् बृ॑ह॒स्पते॑ या॒म्यां यु॒ङि॒ध वा॑चं ॥
 ऊ॒र्ध्वा दि॒शां र॑न्ति॒राशौ॑ष॒धीनां॑ सँव॒त्सरे॑ण स॒विता॑ नो अ॒ह्नां ॥
 रे॒वथ् सा॑माति॒च्छन्दा॑ उ॒ छन्दो॑ऽजा॒त श॒त्रुः स्यो॒ना नो॑ अस्तु ॥
 स्तोम॑त्रयस्त्रि॒ंशे भु॑वनस्य प॒त्नि वि॑वस्व॒द्वाते॑ अ॒भि नो॑ – [] 36

TS 4.4.12.4 - Padam

बृ॒हतीः॑ । नु॑ । शक्व॑रीः । इ॒मम् । य॒ज्ञम् । अ॒वन्तु॑ । नः॑ । घृ॒ताचीः॑ ॥
सुव॑र्वतीति सुवः॑ – वती॑ । सु॒दु॒घेति॑ सु – दु॒घा ॥ नः॑ । प॒यस्वती॑ ।
दि॒शाम् । दे॒वी । अ॒वतु॑ । नः॑ । घृ॒ताची॑ ॥ त्वम् । गो॒पा इति॑
गो – पाः । पु॒र ए॒तेति॑ पु॒रः – ए॒ता । उ॒त । प॒श्चात् । बृ॒हस्प॑ते ।
या॒म्याम् ॥ यु॒ङि॒ध ॥ वा॒चम् ॥ ऊ॒र्ध्वा । दि॒शाम् । र॒न्तिः । आ॒शा ॥
ओष॑धीनाम् । सँव॑त्सरेणेति सं-व॑त्सरेण । स॒वि॒ता । नः॑ । अ॒ह्नाम् ॥
रे॒वत् । सा॒म । अ॒ति॒च्छ॒न्दा इ॒त्याति॑ – छ॒न्दाः । उ॒ । छ॒न्दः ।
अ॒जा॒त॒शत्रु॑रित्यजात – श॒त्रुः । स्यो॒ना । नः॑ । अ॒स्तु ॥
स्तो॒म॒त्रय॑स्त्रिंश इति॑ स्तो॒म – त्रय॑स्त्रिंशे । भु॒व॒न॒स्य । प॒त्नि ।
वि॒व॒स्व॒द्वा॒त इति॑ वि॒व॒स्व॒त् – वा॒ते । अ॒भी॒ति । नः॑ । 36 (50)

TS 4.4.12.5

गृ॒णाहि॑ ।

घृ॒त॒वती॑ स॒वि॒तरा॑धिपत्यैः प॒य॒स्वती॑ र॒न्ति॒रा॒शा नो॑ अ॒स्तु ॥
ध्रु॒वा दि॒शां वि॒ष्णुप॑त्यघो॒राऽस्ये॑शाना॒ सह॑सो या॒ मनो॑ता ॥

बृ॒ह॒स्प॒ति॑ मा॒तरि॒श्वो॒त वा॒युः स॒न्धु॒वा॒ना वा॒ता अ॒भि नो॑ गृणन्तु ॥
वि॒ष्टं॒भो दि॒वो ध॒रुणः॑ पृ॒थि॒व्या अ॒स्ये॒शा॒ना जग॑तो वि॒ष्णु॒प॒त्नी ।
वि॒श्वव्य॑चा इ॒षय॑न्ती सु॒भूतिः॑ शि॒वा नो॑ अ॒स्त्वदि॑तिरुप॒स्थे ॥
वै॒श्वान॑रो न ऊ॒त्या पृ॒ष्ठो दि॒व्य नु॑ नो () ऽद्या॒नु॒म॒ति र॒न्विद॑नुमते त्वं
क॒या नश्चि॒त्र आ॒भुव॑त् को अ॒द्य यु॒ङ्क्ते ॥ 37

TS 4.4.12.5 - Padam

गृ॒णा॒हि ॥ घृ॒तव॑तीति घृ॒त – व॒ती । स॒वि॒तः ।
आ॒धि॒प॒त्यैरि॒त्याधि॑-प॒त्यैः । प॒यस्व॑ती । र॒न्तिः । आ॒शा॑ । नः ।
अ॒स्तु ॥ ध्रु॒वा । दि॒शाम् । वि॒ष्णु॒प॒त्नीति॑ वि॒ष्णु – प॒त्नी । अ॒घो॒रा ।
अ॒स्य । ई॒शा॒ना । स॒ह॒सः । या । म॒नो॒ता ॥ बृ॒ह॒स्प॒तिः । मा॒तरि॒श्वा ॥
उ॒त । वा॒युः । स॒न्धु॒वा॒ना इति॑ स॒म् – ध्रु॒वा॒नाः । वा॒ताः । अ॒भी॒ति ।
नः । गृ॒णन्तु ॥ वि॒ष्टं॒भ इति॑ वि-स्तं॒भः । दि॒वः । ध॒रुणः॑ । पृ॒थि॒व्याः ।
अ॒स्य । ई॒शा॒ना । जग॑तः । वि॒ष्णु॒प॒त्नीति॑ वि॒ष्णु – प॒त्नी ॥
वि॒श्वव्य॑चा इति॑ वि॒श्व – व्य॒चाः । इ॒षय॑न्ती । सु॒भूति॑रिति सु-भू॒तिः ।

शि॒वा । नः॑ । अ॒स्तु । अ॒दि॒तिः । उ॒प॒स्थ इ॒त्यु॒प – स्था॑ ॥ वै॒श्वान॒रः ।

नः॑ । ऊ॒त्या । पृ॒ष्टः । दि॒वि । अ॒न्वि॒ति । नः॑ () । अ॒द्य ।

अ॒नु॒म॒ति॒रि॒त्यनु॑ – म॒तिः । अ॒न्वि॒ति । इ॒त् ।

अ॒नु॒म॒त इ॒त्यनु॑ – म॒ते । त्व॒म् । क॒या । नः॑ । चि॒त्रः । ए॒ति । भु॒वत् ।

कः॑ । अ॒द्य । यु॒ङ्क्ते ॥ 37 (64)

(म॒हि – स॒प्त॒द॒शेना॑ – ऽव॒स्यु॒वा॒ता – अ॒भि नो॑ – ऽनु॑ न –
श्च॒तु॒र्द॒श च) (A12)

Prasna Korvai with starting Padams of 1 to 12 Anuvaakams :-

(र॒श्मि॒र॒सि – रा॒ज्य॒स्य – यं पु॒रो ह॒रि॒केशो॑ – ऽग्नि॒मूर्ध्व –
न्द्रा॒ग्नि॒भ्यां – बृ॒ह॒स्प॒ति – भू॒य॒स्कृ॒द – स्य॒ग्नि॒ना वि॒श्वा॒षाट् –
प्र॒जा॒प॒ति॒र्म॒न॒सा – कृ॒त्ति॒का – म॒धु॒श्च – स॒मि॒दि॒शां – द्वा॒द॒श)

Korvai with starting Padams of 1, 11, 21 Series of Panchaatis :-

(र॒श्मि॒र॒सि – प्र॒ति धे॒नु – म॒सि स्त॒नयि॒न्नु॒स॒निर॑ – स्या॒दि॒त्याना॑ –
स॒प्त॒त्रिं॒शत्)

पद पाठे (वाक्य सहित) – चतुर्थकाण्डे – चतुर्थः प्रश्नः

First and Last Padam of Fourth Prasnam of Kandam 4 :-

(रश्मिरसि – को अद्य युङ्क्ते)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

चतुर्थ काण्डे चतुर्थः प्रश्नः समाप्तः ॥

पद पाठे (वाक्य सहित) – चतुर्थकाण्डे – चतुर्थः प्रश्नः

Details of Panchati and Padam for Kandam 4 , Prasanam 4 – (TS 4.4)

	Panchati	Padams
Anuvakam 1	3	143
Anuvakam 2	3	140
Anuvakam 3	3	178
Anuvakam 4	8	405
Anuvakam 5	2	98
Anuvakam 6	2	129
Anuvakam 7	2	82
Anuvakam 8	1	49
Anuvakam 9	1	71
Anuvakam 10	3	133
Anuvakam 11	4	195
Anuvakam 12	5	264
Total →	37	1887

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in